

**Junior Arends un talento
pa inspira generacion
nobo den musica**

ORANJESTAD (AAN): Durante reciente recorrido den cuadro di Accion di BARIO, Prome Minister Eman a haya oportunidad pa sinta y combersa cu Junior Arends, un pianista conoci den comunidad cu ta biba na Paraguana. Den su cas, Arends a desaroya un scol di piano cu actualmente ta guia mas di 70 alumno, incluyendo mucha y adulto cu ta tuma les regularmente. Den su scol, e alumnonan no solamente ta siña toca piano, pero tambe ta interpreta y conoce composicionnan di Aruba, incluyendo obra di nos reconocido artista local Padu del Caribe. Di e manera aki, Arends ta stimula no solamente talento musical, pero tambe apreciacion pa cultura, historia y identidad Arubiano.

Premier Eman a expresa su gradicimento pa e aporte di Junior Arends na formacion musical di generacionnan nobo. Segun Eman, e talento di Arends y su dedicacion pa educacion musical ta un contribucion importante na cultura di Aruba.

Eman a resalta cu musica, specialmente composicionnan Arubiano, manera esnan di Padu, a hunga un papel importante den historia di Aruba, despertando sentimento di orguyo, identidad y patriotismo den e pueblo durante diferente periodo di su desaroyo como pais. Ademas, Arends a desaroya tambe un buki educativo di piano cu ta yuda alumno cuminsa cu e base di e instrumento, mientras cu e material tambe incorpora ilustracionnan y referencia na lugarnan pintoresco di Aruba. Segun Eman, iniciativanan manera esaki ta contribui pa inculca den e muchanan no solamente amor pa musica, pero tambe aprecio pa e beyeza natural y cultura di nan isla.

**Adulto mayor a
bira malo tras di
stuur y fayece**

■ **Ocasionando accident den De La Sallestraat**

• *Cu su auto fo'i control a subi acera ranca borchinan*

• *Finalmente auto a bay dal contra un otro*

Paramediconan a purba reanima sin exito

ORANJESTAD (AAN): Diamars mainta algo prome cu 12'or a sosode un accidente na e rotonde banda di La Salle College, ora cu e chauffeur adulto mayor a bira malo tras di stuur, subi y ranca dos palo di borchin trafico, y finalmente dal cu su Buick Regal den un Kia Rio.

Paramediconan a yega cu urgencia hunto cu Polis, y a trata di reanima e persona como cu no a detecta señal vital mas. Na final no por a haci nada, y Docter a constata morto di e chauffeur di 74 aña. El a wordo identifica como Orlando Edmundo Lo-Fo-Sang, kende ta ex-



docente di John F. Kennedyschool. Vocero Liliana Rasmijn di Cuerpo Policial a indica na DIARIO cu e accident aki no ta wordo conta como 'Morto den Trafico', debi cu e chauffeur a fayece door di problema di salud, y no pa motibo di trafico. **Mas detaye na pagina 3.**

Clifford Rosa, director di Fundacion Rancho:

E espacio na Lagoen pa practica di deporte di Boto Miniatura a wordo kita"

•Ya no tin gazebo mas



ORANJESTAD (AAN)-- Director di Fundacion Rancho, Clifford Rosa, den entrevista cu DIARIO, a comenta cu pa carera di boto (miniatura), normalmente nan ta banda di lama, pero e bez aki el a mira e desaroyo for di Biblioteca Nacional. El a duna di conoce cu e practica cul-

tural intangible di hunga boto, a wordo kita!

"Pero nos ta wak e desaroyo cu tin eybanda tambe; awo no tin gazebo mas, y esey tambe ta haci cu un di e espacionan cu hendenan por a bay practica e herencia cultural intangible aki, hunga boto, a wordo kita", Clifford Rosa a señala.

El a agrega cu esey ya caba a duna un contesta cu mester di mas informacion y mas empuhe tambe pa mira con nan por yega na un lugar bek, unda cu capitan, participantenan y nan famia por yega eybou, cu tin un sombra cu nan por haci parti di loke ta nan herencia di, eigenlijk, hunga boto. Rosa



tin entendi cu e motibo di esaki ta, cu gobierno ta bezig cu embeyecimento pa turismo.

"Pues esey lo tin di haber cu ATA, cu ta esun cu ta trahando tur e gazebonan cant'i di e costanan na Aruba, y tambe ta un di esunnan cu lo a financia e proyecto aki,

cu mester bin eynan, pero kico e lo ta te ainda nos no sa", Clifford Rosa a relata. El a duna di conoce cu e Fundacion a acerca puntrando aworaki kico e proyecto tin riba e brug na Lagun, cu ta conecta di biaha na e beach, y pa nos ta importante kico lo por pasa

y kico ta mehoracion. "Nos ta mira e renovacion di e monumento na e piscadornan cu ta perdi, y nos a premira cu lo por tin mas desaroyo positivo den e banda ey pa nos comunidad", Clifford Rosa, Director di Fundacion Rancho, a señala.

Directie Natuur en Milieu ta lansa encuesta tocante e uzo di blaas y confetti den aire liber

ORANJESTAD (AAN): Na aña 2019 a drenta na vigor e ley Algemene Politieverordening Artikel 55a, cual ta prohibi e uzo di blaas y confetti di plastic den aire liber (pafo). E materialnan aki no ta prohibi completamente, nan por sigui wordo uza den espacio cera (paden) y ainda ta disponibel pa benta riba mercado local.

Cu e encuesta aki, Directie Natuur en Milieu (DNM) ta desea di haya un miho bista riba con familiar comunidad di Aruba ta cu e ley aki y con nan ta percibi e prohibicion di uzo di e materialnan aki den aire liber.

Participacion di comunidad lo yuda evalua e nivel di conocimiento riba e ley aki y asina por sigui prepara mas informacion pa conscientisacion pa cu

uzo di e materialnan aki responsablemente den futuro.

Con pa participa:

Pa participa por bay na ecanv.com/survey of scan e QR Code y scoge e idi-

oma cu ta prefera, sea ta Papiamento, Ingles of Spaño. E encuesta aki ta uno cortico c'un duracion di mas o menos 3 minuut y ta completamente anonimo.

Petchi 'ARUBIANO' ya caba riba mercado

ORANJESTAD (AAN): E petchinan aki di ARUBIANO, marca nacional ta invitabo pa busca bo pechi ya caba, na caminda pa celebracion di Dia di Himno y Bandera, 18 di Maart.

Corda cu Arubiano brand ta parti di nos cultura. Abo tambe por join hunto cu Arubiano: Saca portret of selfie, cu bo grupo, coleganan, famia, y post y share cu nan social media,

uzando hashtag #PatriaAprecia

Instagram Arubiano of Facebook y nan ta publica bo potret cu bo pechi Arubiano riba e 'Aruba Wall Of Fame'

E coleccion nobo di pechi cu Escudo di Aruba den Blanco, Oranje y Preto cu Blanco, nos Strea Cora y pechi Betico nos Libertador. Obtenibel caba na Super Food, Breezy Seaside Island Mart, Vice Versa, Natural Bridge, Wine & Spirit na Playa Linda, Ling & Sons, Tradewinds Aruba na diferente hotel, y tambe na Da Drogist.



Paramediconan a purba reanima e victima pero no a logra

Adulto mayor a bira malo tras di stuur y fayece den accident den De La Sallestraat



ORANJESTAD (AAN): Diamars mainta algo prome cu 12'or a sosode un accidente na e rotonde di De La Sallestraat cu Caya Ernesto Petronia y Profesor Lorentzstraat. Aki un auto sedan Buick Regal color blanco, cu un adulto mayor tras di stuur, a perde control riba su stuur un poco prome cu e yega e rotonde. El a sigui pasa straight, subi acera casi dal den dos palo di luz instala banda di otro, pero si a ranca un tubo cu borchì di trafico, sigui bay pariba. Aki el a dal den di dos borchì di trafico, y aida a sigui bay pariba.

Despues di a caba di ranca e di dos borchì, el a core riba e pida na banda di parkeer, y a bay dal tras di un Kia Rio hatchback color blauw scur staciona dilanti La Salle College.

A sali na cla cu e adulto mayor masculino tras di stuur di e Buick Regal, a bira malo na forma agudo na e rotonde, pues no tabatin

control mas riba su stuur ni riba e pedalnan di trot ni di brake. Ta e impacto contra e Kia Rio a pone e auto stop. Alumnnonan eybanda pafo di La Salle College a spanta, y varios persona a core yega cerca.

Paramediconan trahando: E testigonan a bin topa cu e chauffeur no ta reaccionando, y mesora pa 11:54 am e yamadanan a cuminsa drenta na Central di Polis. Hendenan a informa di e accident, y cu e chauffeur lo a bira malo y pesey a ocasiona e impactonan aki.

Ademas di manda Polis, a core avisa Ambulance tambe. Mirando cu e adulto mayor masculino no tabata reacciona na manda dos Ambulance pa yuda miho.

Ora cu Paramediconan a yega, nan a baha e chauffeur pone drumi abao, y a pone ECG Mashin na su curpa, y a mira cu e no tin señal vital. A cuminsa practica CPR y pone algun awa di bida pa



duna asistencia, pero despues di algun rato a ripara cu nada mas ta yudando.

Manda pidi pa Docter: No a keda ningun recurso, cu djis pidi Polis pa manda Docter na e lugar. E accident aki a rekeri tambe personal di Trafico pa atende, y Polis a manda personal di Bureau Slachtofferhulp tambe.

Docter Forensico di Polis, esta Dr. Voskuil a yega na e lugar, y el a constata morto di e chauffeur Orlando Edmundo Lo-Fo-Sang, naci na Suriname dia 10 September 1951, pues e tin 74 aña di edad.


Vocero Liliana Rasmijn di Cuerpo Policial a indica na DIARIO cu e accident aki no ta wordo conta como 'Morto

den Trafico', debi cu e chauffeur a fayece door di problema di salud, y no pa motibo di trafico. E chauffeur meener Lo-Fo-Sang di e Buick Regal aki modelo 1981, ta un ex-docente di LTS di John F. Kennedyschool. Na su familia y conocirnan, DIARIO y Cuerpo Policial ta manda palabranan di condolencia.

Efecto di atakenan riba Iran...

Gasolin ta subi awe fuerte cu casi 10 cen pa liter

Prijs nobo combustibel na Aruba



keda paga e mesun tarifa pa gasolin cu ta bayendo 4 aña caba mescos.

Na Jamaica tambe, e compania Petrojam a anuncia cu e aumento di crudo lo no bay afecta chauffeurnan hopi na e pais. Pasobra e refinarianan na Jamaica a logra di suavisa e efecto, danki na nan framework di stipula prijs. E mecanismo di stipula prijs di Petrojam, a mitiga e impacto completo di e aumento mundial di crudo.

Na Aruba mientras tanto, e isla no tin refinaria, pues tin di keda paga pa e costo halto di transporta Gasolin, Diesel, y Kerosine pa e isla. Pesey riba Diamars mainta, Ministro di Finansa, Asunto Economico y Sector Primario a anuncia cu entrante awe 11 di Maart 2026 lo tin aumento

di prijs pa Aruba.

Awe Diaranson, prijs di Gasolin tipo Unleaded-Premium lo subi cu 9,8 cen, pa wordo bendi awor na 223,4 cen pa liter.

Prijs pa combustibel Diesel Ultra Low Sulphur (ULS) lo subi cu 8,5 cen, pa wordo bendi awor na 201,4 cen pa liter. Prijs pa Kerosine ta subi cu 10,7 cen, pa wordo bendi awor na 192,3 cen pa liter. Tur e prijsnan ta inclui BBO/BAZV/BAVP.

Aunke e aumento ta tiki fuerte cu casi 10 cen pa liter di Unleaded, toch algun observador a keda asombra cu e no a subi cu 18 cen of mas e siman aki. Pa awor, 10 cen ta un tiki aceptabel y automobilistanan lo tin di djis trata di ta mas eficiente ora di core e dlanan aki.



Cuminsando cu 4 florin, bo por gana e suma grandi aki

Afl.

240.000,-

Obtenibel na cualkier rebendado di Lotto.

sorteo ta awe nochi 7:45 pm



HUNGA AWO



Parlamentario di AVP, Jennifer Arends-Reyes:

Minister plenipotenciario ta e bos oficial di Aruba na Den Haag

ORANJESTAD (AAN): Parlamentario di fraccion AVP, Jennifer Arends-Reyes, a destaca importancia di e rol di Minister Plenipotenciario di Aruba como un puesto clave den representacion di Aruba dentro di Reino Hulandes. Segun Arends-Reyes, e funcion aki tin un balor strategico, pasobra e minister plenipotenciario ta e bos oficial di Aruba na Den Haag, unda e paisnan di Reino ta mantene dialogo constante riba diferente tema di gobernacion, cooperacion y desaroyo.

Arends-Reyes a splica cu e minister plenipotenciario ta cumpli un rol fundamental den mantene y fortalece e relacion entre Aruba y e otro paisnan dentro di Reino. E representante di Aruba ta participa activamente den reunionnan importante di consulta y cooperacion, manera e reunionnan di Consejo di Minister di Reino (Rijksministeraad).

Den e reunionnan aki ta discuti tema di gran relevancia pa futuro di e paisnan dentro di Reino,



incluyendo cooperacion economico, gobernacion, seguridad y desaroyo social.

“Pa Aruba ta di gran importancia cu nos tin un representacion profesional y comprometi na Den

Haag. E minister plenipotenciario ta e brug entre Aruba y e institucionnan di Reino, y e ta contribui pa percura cu e interesnan di nos pueblo ta wordo representa y defendi na nivel di Reino,” Arends-Reyes a indica.

Den e mesun contexto, Arends-Reyes a tuma e oportunidad pa felicita Milly Schwengle cu su nombramento como Minister Plenipotenciario di Aruba. Segun e parlamentario, e puesto aki ta bin cu gran responsabilidad, pero tambe cu un oportu-

nidad importante pa contribui na fortalecimiento di posicion di Aruba dentro di Reino.

“Mi kier felicita Sra. Schwengle cu su nombramento y desea e hopi exito den e tarea importante aki. Representa Aruba den Reino ta un gran honor. Mi tin confianza cu, cu su experiencia, dedicacion y conocimiento, e lo sigui traha pa promove e interesnan di nos pais y fortalece e cooperacion dentro di Reino,” Arends-Reyes a conclui.

El a dal’e cu piedra grandi den cara

Homber cu maltrato brutal riba su mama na Shiribana



ORANJESTAD (AAN): Dialuna den oranan di atardi, un unidad di Polis a ser manda na un adres conoci pa autoridadnan na Shiribana na Paradera. E informe a drenta cu un conocido di husticia, a caba di maltrata su mesun mama.

Pa Polis, esaki no ta prome biaha cu patruya ta bay na e mesun adres aki, pa atende e homber problematico aki. Autoridad sa cu unda cu e acudi, ta problema y dolor di cabes so e ta ocasiona.

E atardi aki, a bin haya sa cu e homber a uza un obheto duro pa dal su mama. Despues a haya informacion cu ta un piedra grandi el a gara den su man, y el a bay dal esaki na forma brutal den cara di e mama inocente.

Polis a pidi pa presencia di Ambulance, pasobra e golpi fuerte aki cu e piedra grandi posibelmente a ocasiona un fractura na e cachete di e mama.

Ora cu Polis a yega, ya e homber cobarde aki a core huy di e cas. Pues e ta fuerte, pero no kier para responsabel pa su actonnan. Sinembargo Polisnan sa bon ken e ta, y unda kizas nan por gar’e. Su number lo hunga un di e dianan aki.



TRABOU DI MANTENCION DEN TRANSFORMATORSHUIZEN NA ORANJESTAD
Interupcion di Coriente Planea

En conexion cu trabounan necesario pa mantene un suministro di coriente confiable, e servicio di coriente lo wordo interumpi:

Diahuebs, 12 di maart 2026
8:30 AM te cu 3:30 PM

Den vecindario di:

- Canoastraat (un parti)
- Chilestraat
- Driemasterstraat (un parti)
- Goletstraat (un parti)
- Pagaastraat
- Prof Lorentzstraat
- Socotorowijk
- Venezuelastraat (un parti)
- Weststraat
- Braziliastraat
- Colombiastreet
- Perustraat

N.V. ELMAR ta pidi disculpa pa e inconveniencia cu e interupcion di coriente aki por causa.

Bishita www.elmar.aw pa mira e lista di adresnan afecta.

Danki pa e comprension.



Riba Green Corridor

Diasabra anochi a gara automobilista moviendo 170 km/h



ORANJESTAD (AAN): Den fin di siman cu a pasa, Polis-nan di Warda di Santa Cruz a dicidi na tene un control general, dirigi riba velocidad halto.

Nan a bay haci esaki pa mira si tur hende ta respeta e velocidad maximo di 80 km/h riba Green Corridor.

Polisnan a bay para na

diferente puntonan strategico y cu cooperacion di Unidad Motorisa a tene e accion di e control.

Resultado: Segun vocero di Polis, e anochi aki un total di 112 boet a wordo reparti na automobilistanan cu tabatin nan pia demasiado pisa ta primi e trot.

Vocero Liliana Rasmijn a



confirma na DIARIO, cu e velocidad mas halto cu Polis a detecta cu nan radar, ta di un automobilista coriendo 170 km/h. El a wordo para, y a haya su boet. Chens ta grandi cu e tin di bay aparece dilanti Hues, cu riesgo di perde su rijbewijs. Esey tin di wordo dicidi door di Ministerio Publico.

Detencion: Polis a indica u nan a haci dos detencion tambe durante e control. Auto-

ridad a confirma, cu e prome detencion tabata di un menor di edad cu tabata manehando e vehiculo di motor. E di dos detencion tabata pa maneha un vehiculo di motor bao influencia di alcohol.

Polis a adverti cu e controlnan lo sigui y e meta principal ta pa concientiza loke ta e seguridad den trafico. Percura pa bo papelnan ta na ordo y si bo ta bebe no stuur. Busca bo amigo responsabel.

Partido MEP

Carlos Bermudez no ta cu compronde loke Evelyn a firma na 2024 ta full diferente cu loke tin awor riba mesa

ORANJESTAD (AAN): Parlamentario di AVP Carlos Bermudez, cu hopi hende toch tabata tin respet p'e, ya a cuminsa cansa hende cu e mesun cantaleta.

Hende no kier sa kico Evelyn a firma, tur hende sa kico Evelyn a firma y tur hende sa kico Gerlien y Mike a firma.

Evelyn a firma un BESTUURLIJK ACCOORD 2024 di 2 pagina. Gerlien y Mike a firma un RIJKSWET HOFA di 50 pagina. Tur hende sa esey. Nan firmanan ta riba papel.

Loke hende kier sa ta unda Carlos Bermudez MES ta para. Bo no a lesa e ley ainda? Bo no a compronde ainda? Bo mes no por saca bo conclusion? Bo mes no por busca conseho? Stop di sconde bou saya di Evelyn, cuminsa sali dilanti y bisa kico ABO ta para p'e.



-Diferencia GRANDI entre loke Evelyn a firma, y loke Gerlien y Mike a firma.

Evelyn a firma pa cuminsa negocia. Gerlien y Mike a completa e negociacion. Loke tin awor riba mesa NO ta bon pa Aruba, Aruba no por sali nunca mas di dj'e, e ta contra Constitucion di Aruba y pa colmo e no ta necesario tampoco.

Evelyn mes a bisa: si ta e a wordo presenta cu loke tin awor riba mesa, e lo a rechasa esaki y bisa Hulanda "NOS MES POR". Carlos Bermudez ta di mesun opinion?

LUNA DI LOCURA!

CUMpra 2 LOTTO 5 Y HAYA 1 LOTTO 5 LOCO GRATIS

CON PA HUNGA?

CU CADA COMPRA DI 2 LOTTO 5 RIBA E MESUN TICKET TA RICIBI 1 LOTTO 5 LOCO COMPLETAMENTE **GRATIS**. MAS BO CUMpra, MAS TICKET LOCO **GRATIS** BO LO RICIBI!

PROMOCION TA VALIDO DESDE 1 DI MAART TE CU 31 DI MAART

www.lottoaruba.com



Oproeping:

De griffier van het Gerecht in Eerste Aanleg van Aruba roept hierbij op:

- DOUGLAS, Rallian Dorvent

om op dinsdag, 16 juni 2026 om 09:15 uur voor de rechter in het Gerechtsgebouw in Aruba to verschijnen, voor de mondelinge behandeling in verband met een door LAWES, Hylton ingediend Gerechtelijke vaststelling vaderschapverzoek AUA202500280 EJ.

de Griffier, M.M. Kelly

Parlamentario Xiomara Maduro:

Minister Gerlien Croes a gaña pueblo cu no ta nombra GevMin pa motibo di costo halto

ORANJESTAD (AAN): E decision reciente di Gobierno AVP FUTURO pa finalmente nombra un Minister Plenipotenciario (GevMin) na Hulanda, ta muestra cu e presion politico a funciona, pero tambe cu Minister di Relacion den Reino, Gerlien Croes a gaña pueblo di Aruba. Algun luna pasa, ainda Minister Gerlien Croes tabata defende e decision pa no nombra un GevMin na Hulanda, cu e argumento cu e puesto ta costa pueblo demasiado placa. Sin embargo, despues di critica fuerte y presion den



Parlamento, Gobierno AVP FUTURO a cambia rumbo y a dicidi pa nombra un GevMin den persona di sra. Mildred Schwengle. “Prome pueblo a wordo bisa cu no por nombra un GevMin pasobra ta caro. Cu pa spaar placa, Minister Gerlien Croes mes lo biaha cada luna bay Hulanda. Awo a resulta cu



Gerlien Croes

Mi a wak nan ta grita cu nos Gabinete ta escohe pa nos mesun Ministersnan representa Aruba den RMR na Hulanda.

Boso check out akinan cuanto GevMin ta costa Aruba pa aña, nan a paga 2 GevMin 8 aña largo y e resto... nos tur sa.

357 mil EURO pa aña!

Conclusie

Hieronder, in Tabel 10., volgt een overzicht van zowel de structurele als de incidentele kosten die gemoeid zijn met de functie van de Gevoormachtigde Minister van Aruba in Nederland, ter uitvoering van de werkzaamheden namens de Arubaanse regering van de taken, welke nader verankerd zijn in de artikelen 8, 10, 12, 15, 17, 18, 21 en 24 van het Statuut voor het Koninkrijk der Nederlanden (BWBR002154).

Tabel 10

Omschrijving	Regeling	Incidenteel Bedrag €	Structureel Bedrag €
1. Verhuizen naar Nederland	Lvpa art 16	23.800,00	36.000,00
2. Huurvesting woning (180 m²)	Lvpa art 17	6.000,00	1.098,53
2.1 Gemeentelijke lasten (Dekking Land Aruba (50%))	MR BE64/23		1.200
2.2 Gas/Water/Elektra (Dekking Land Aruba (50%))	MR BE64/23		300,00
2.3 Woning internetkosten	Lvpa art 1		2.570
3. Telefoonkosten	Lvpa art 17		112.000,00
4. Dienst Auto en autotoelage	Lvpa art 8		5.422,00
5. Representatiekosten	Lvpa art 16		13.860,00
6. Dienstreizen	Lvpa art 10/11		23.020,00
7. Persoonlijk reizen naar moederland	MR BE64/23		6.200,00
9. Jaarlijkse bezoldiging	Lvpa art 4 lid 3		107.319,42
10. Verhuizen naar terug Aruba	niet	18.800,00	
Totaal		48.600,00	308.898,95
			€ 357.489,95

De structurele jaarlijkse kosten voor de uitoefening van de functie van de Gevoormachtigde Minister van Aruba in Nederland (GevMin) zijn geraamd op € 308.898,95, met een totaal geraamde lastendruk van € 357.489,95 inclusief incidentele kosten (€ 48.600,00). Dit geraamde bedrag is indicatief en kent een mogelijke afwijking van plus of min 10% tot 15%.

Aruba toch a nombra un GevMin. Esaki ta muestra cu pueblo a wordo gaña pa Gerlien cu e argumento di costo halto,” Parlamentario Maduro ta expresa. Maduro a agrega cu representacion permanente na Hulanda no ta un luho, sino un obligacion di Aruba anca den Statuut di Reino Hulandes. E situacion aki ta muestra cu e decision original di Gerlien Croes tabata mal pensa y cu ta danki na presion politico, Gobierno AVP FUTURO a corigí nan error. Ta keda si e hecho lamentabel, cu Gerlien ta gaña pueblo!

SC

Skina di
CLYDE

Grupo Sweet Sixteen cu meta pa embeyece caya di Sero Blanco 618 te 633



Diabierna 6 di Maart tabatin e reunion di batisamento di e grupo Sweet Sixteen, un inspiracion di señora Milagro Harms-Bracho.

E inspiracion a haya bida despues cu Sr. Alex Tavarez y señora Iris, bisiñanan cu ta biba riba e mes un caya, a gusta e idea y a ofrece di colabora.

E meta di e grupo ta pa trece dilanti, problemanan di e vecindario y trata di soluciona nan conhuntamente.

E nomber Sweet Sixteen ta refleha e 16 casnan den e mes vecindario cu a haya un carta di invitacion pa e prome reunion. Milagro y Iris personalmente a pone e cartanan den nan postbox.

Prome cu e reunion a cuminsa, Minister Dowers, invita pa Alex, a bin scucha



Representanten cu a asisti e reunion di batisamento di e grupo Sweet Sixteen.

Milagro, Iris y Alex pa e mira con gobierno lo por yuda. Sr. Dowers a keda di averigua kico gobierno lo por haci.

E grupo a trece dilanti hopi problema: Cachonan cu ta susha caya, caya den mal estado, falta di spacio pa stationa e cantidad di auto, auto mal para den skina, awa cu ta keda para despues di yobida, falta di iluminacion, e necesidad di embeyece e vecindario y hopi mas.

Esnan presente na e prome reunion a haya un formulario pa yena cu ta contene con nan por wordo contacta, pa local un grupo Sweet Sixteen di Whatsapp lo wordu crea. Lo trata di convence esnan cu no a bin cu nan presencia ta necesario.

A keda palabra cu e grupo lo tene e proximo reunion mas pronto posibel. Nos ta felicita Milagro y nos ta spera cu su bunita inspiracion lo tin hopi exito y lo sirbi como ehempel pa otro.

Mi ta spera bo comentario na:
clydeharms@gmail.com

Awe Diaranson lo finaliza asfaltamento di e T-weg modifica di Lacle Boulevard



ORANJESTAD (AAN): Den fin di siman cu a pasa, personal di DOW a frees e asfalt bieu cu tin riba e caminda, cu awor ta bira e T-weg nobo na final di Lacle Boulevard, na e cruzada cu Henny Eman Boulevard.

Esaki ta debi cu e parke di Monumento di Guera a bira mas grandi, y substancialmente ta bay embeyece e area aki cu semper tabata un tiki fo'i control. Ora cu e keda cla, e lo bay luci y lo bira un espacio pa tur hende goza di dje.

Diamars a cuminsa pone asfalt nobo, y awe Diaranson den dia lo finaliza cu e trabaonan ey.

MAESTRO BENJAMIN

MAESTRO BENJAMIN, UN MAESTRO CU DI BERDAD TA PARA SUFRIMENTO.

Bishit'e abo mes! Maestro Benjamin ta sigui y caba cu e trabao cu otro a cuminsa na otro lugar.

• E ta kita bruheria, hechizos, daños y tambe e ta dera maldicion y salamientos.

• E ta cura y sana tur tipo di enfermedad manera artrosis, alzheimer, demencia, depression, diabetico, hipotiroidismo, osteoporosis, parkinson, insomnia y hopi malesa mas.

Abo mi amigo stima, cu ta sufriendo di bo prostaat of impotencia sexual, Maestro Benjamin tin e tratamiento pabo cu lo curabo den un tempo cortico.

“Mi ta cura problema di addiction di droga y alcohol y mi ta recupera bo ser kerí sin importa tempo of e distancia.”

No sufri mas den silencio pa tur problema tin un solucion y pa tur enfermedad tin un sanacion. Trabao ta 100% garantisa y den un poco tempo.

Yama awe mes of manda un WhatsApp na 641-4186 pa traha bo afspraak.

CEL/ 641-4186

Clifford Rosa, director Fundacion Rancho:

Tratando na reactiva e Club pa eventonan y desaroyo di boto miniatura

ORANJESTAD(AAN)-- Director di Fundacion Rancho, den entrevista cu Matutino DIARIO, a duna di conoce cu intenciona di e Fundacion ta pa e aña aki nan traha un tiki mas, riba locual ta e club cu tabata existi, specialmente pa e eventonan y desaroyo di boto

miniatura.

El a menciona cu mayoria di e hendenan aki a fayece, pero como fundacion loke nan ta haciendo ta wak con ta bay explora hendenan pa drenta den e organizacion, activa e club aki un biaha mas, p'asina ey e por funciona tambe, anto



dornan sa, sali cu boto di bela, bay pisca bin bek cu cuminda, y esey tambe a duna, eigenlijk, un ofishi. Anto e ofishi ey tambe ta bayendo atras", Clifford Rosa ta lamenta.

Curso pa siña traha boto di bela lo wordo reactiva. "Aworaki nos ta saliendo pa 18 di Maart, y nos tin nos programa pa April tambe, pasobra nos kier pa e bira algo pa bay scol. Eigenlijk nos kier pa tin material educativo, mas conocimiento rond, pasobra nos ta trahando material. Aruba International Regatta, ya ta na mitad di aña, y nos a cumincaba con nos ta bay haci e trabao hunto cu ne, p'asina no solamente educa e personanan profesional cu tin, pero tambe nos hobennan pa nan haya mas gana di bay hunta cu boto di bela, na lama", señor Clifford Rosa, director di Fundacion Rancho, a conclui.

HELP - ADOPT BUSCANDO UN HOGAR

CHARLIE

&

COOKIE



BO TIN ESPACIO DEN BO CURASON Y HOGAR PA UN AMOR INCONDICIONAL?
YAMA AWE MES NA 5925130 OR 5925172

No tin gasto di adopcion

Un check-up na veterinario y un saco grandi di cuminda di cacho ta inclui cu e adopcion.

CharlieCharlie a wordo rescata door di Bureau City Inspector di un cas hunto cu su ruman den hopi malo estado. **Nan a wordo poni na Centro di Control di Cacho (CCC).** Pa Charlie su ruman tabata ya mucho laat. **ARA a tuma Charlie for di CCC y a dunele tur e cuido veterinario necesario.** Charlie a recupera y a bira un cacho hopi alegre. Charlie ta gusta core tras di lagadishi y hunga cu otro cachonan. Lamenta te dia di awe Charlie no por a haya un famia. Charlie no ta pidi hopi, djis amor y cariño, un cura sera unda e por core y hunga y un bon cuido. Si bo tin esaki pa ofrece Charlie, pls no duda mas, contact nos awe mes. Nos ta sigur cu bo lo keda enamora di Charlie.

Cookie a wordo rescata despues di Pandemia pa di dos biaha. Cookie a wordo maltrata door di su prome doño. Despues di a haya un otro doño esaki a bandona Cookie riba caya. Cookie a wordo rescata pa ARA y a haya tur cuido necesario. Cookie ta awe un cacho alegre y cu ta gusta core hunto cu Charlie trs di lagadishi. Pero lastimamente Cookie tampoco no a haya un cas ainda. Cookie ta poco timido pero manera cu e custumbra Cookie ta full parti sunchi pa loco. Cookie tampoco ta pidi hopi; pasenshi, amor, cuido y un cura sera. No duda den yama nos awe mes. Cookie ta warda bo! P.s. no tin costo pa adopcion. ARA lo zorg pa nan ta update cu nan vacuna y tambe lo zorg pa 1 saco di cuminda. Nan por wordo adopta na exterior tambe y ARA lo paga tur e gastonan. **Contact nos libremente riba e numbernan riba e flyers.**

haci por ta, mas carera.

"Como fundacion no ta prome cos cu nos tin pa haci, pero si pa conserva e herencia cultura intangible. E aña aki tin mas hende cu a yama nos pa duna nan informacion; pues, nos ta activo den esey dia 17, pero tambe treciendo informacion na muchanan di scol pa nan haya interes tambe den algo asina. Nos ta keda un isla y ta masha di lamenta cu ta poco interes tin pa hunga cant'i lama, cant'i awa y hunga boto. Eigenlijk, esey ta un manera inicial pa nos muchanan por bin den contacto cu bot'i bela",

Clifford Rosa a subraya.

El a señala cu esaki ta importante pasobra e por duna bo hopi mas conocimiento den futuro, pa e decisionnan cu bo ta tuma. "Ban pone, si bo kier subi lama mes, con bo ta siña nabega boto di bela, con bo por atende cu boto di bela den un isla p'asina ey bo bay otro isla", director di Fundacion Rancho a señala.

El a agrega cu e ta papia relativamente facil, pasobra den e statutonnan ta poni cu nos tin cu conserva parti di nos heren-cianan y un di e parti aki ta piscado. "Y nos pisca-

Hopi Polis pa por a domina un homber agresivo na Noord



ORANJESTAD (AAN): Tabata Dialuna anochi cu Polis di Noord a move cu urgencia pazuid di un pacus grandi na Noord, debi cu eybanda tin un homber actuando straño.

Na yegada di e patruya, e agentenan policial a ripara cu e homber tin un cuchiu den su poder. Mesora na un forma



tactico, e agentenan a cum-inza papia cu ne, pa e com-pronde nan ordo pa e pone e cuchiu abao na suela.

Despues di varios papiamento, a logra cu e homber a pone e arma blanco abao. Pero e situacion no a normaliza. Pasobra ora cu agentenan a yega cerca pa pone boei

rond di man di e homber aki, el a cumenza resisti. Polisnan e ora a core pidi refuerzo di mas patruya pa yuda nan.

E vehiculo di transporte di CEA a presenta pa hiba e homber aki rumbo pa Warda di Polis. No ta conoci si e portabata bao di un of otro sub-stancia cu el a bira raro.

Parlamentario Rocco Tjon:

Introduccion di e Digital Kindvolgsysteem lo percura cu ningun mucha ta keda sin e atencion cu e merece



ORANJESTAD (AAN): Diamars 3 di maart 2026, Comision di Salud di Parlamento a tene un reunion informativo y hopi productivo cu e departamento di Jeugdgezondheidszorg

(JGZ) di Directie Volksgezondheid (DVG).

Durante e reunion aki, a keda demostra cu tin un vision solido y hopi trabou den ehecucion y of den "tapara" pa garantisar un

desaroyo sano pa tur mucha y hoben na Aruba.

Parlamento a wordo informa riba e esfuerso grandi cu e team multidisciplinario di JGZ ta desplegando. A resalta cu,

a pesar di limitacionnan, e departamento ta den un fase importante di transformacion caminda hopi proyecto crucial ta den etapa di planificacion avansa y of den implementacion. -Avance y Proyectonan den TaparaUn di e puntonan di mas positivo ta e introduccion di e Digital Kindvolgsysteem (EKD). Esaki ta un paso gigante den modernisacion cu lo permiti un miho coordinacion entre salud, scol y instancianan di ayudo. E sistema aki lo percura cu ningun mucha ta keda sin e atencion cu e merece. Ademá, a papia encunto fortificacion di e programa di vacuna y e monitoreo continuo di e crecimiento y desaroyo di nos mucha y hobennan.

E meta pa e periodo 2026-2030 ta ambicioso y positivo: un JGZ mas fuerte, cu miho base legal atraves di e Landsverordening Publieke Gezondheid, y un rol central den e red di cuido integral pa nos hubentud. Maske e vision ta positivo, e reunion a sirbi tambe pa identifica areanan cu mester di extra atencion y inversion pa por logra e metanan aki.

Parlamento ta gradici e team di JGZ pa nan dedicacion y transparencia. E comision a compromete su mes pa keda monitoria e desaroyonan y pa duna e sosten necesario pa logra cu e vision di un hubentud sano ta bira un realidad concreto pa cada hogar na Aruba.

Polis a detene señora burachi cu a ocasiona accident



ORANJESTAD (AAN): Tabata Dialuna anochi, cu Central di Polis a manda un agente policial encarga cu Trafico, pa bay check un caso den Driemasterstraat. Pasobra un simple accident unda un auto a dal tras di otro, a cambia di esencia ora cu a mira cu un di e personanan tin característica di ta bao influencia.

E accident su investigacion a cuminsa prome cu e profesionalnan di Forensys cu a bay check e accident aki den Driemasterstraat cerca cu e cruzada Venezuelastraat. Pa un accident asina di dal tras di otro y unda no tin hende herida, ta e personal di Forensys mes por atende.

E accident ta debi cu e chauffeur femenino di un Toyota Corolla color shinishi cu number A-81950 no a regla su velocidad na tempo, y a bay dal tras di un Chevrolet Spark color blauw cu number A-29462.

Personal di Forensys pa-

piando cu e chauffeur femenino di e Corolla, a nota cu e tin característica di ta bao influencia. Pesey segun protocolo, e ora tin di yama Polis como

cu e situacion di accident a cambia completamente.

Polis di Trafico a yega y a atende cu e chauffeur aki, y e tambe mesora a ripara característica di ta hende bao influencia. E ora a pidi cooperacion di e chauffeur femenino pa e haci test di supla, y el a duna OK. Pero ora di supla den e aparato di AlcoSensor, esaki a duna un cifra di $\mu\text{g/l}$ cu ta hopi mas halto cu e limite legal di Aruba.



Pesey mesora Polis a pone boei na su mannan, y indica na dje cu e ta bao aresto. A manda busca vehiculo di transporte cu a bay cu ne Warda di Polis, pa e ser presenta dilanti un Fiscal Auxiliar. Hopi biaha debi cu e chauffeur ta burachi, esey kiermeen cu su Aseguro lo no cubri e gasto di daño ocasiona door di dje tampoco. Pues aki su cartera tambe lo bay haya un deuk aden pa drecha auto kibra di otro hende.

Fraccion di MEP:

Transparencia no ta un opcion, e ta un deber pa cu pueblo

ORANJESTAD (AAN): Cu un record impecabel di accion den Parlamento, Fraccion di MEP ta demostra cu nan rol di control no ta keda den palabra so. Den e cuadro di integridad y bon gobernacion, e fraccion awor ta considerando e instrumento di control mas fuerte cu ley ta brinda: un Encuesta Parlamentario pa yega na e berdad den e caso di Minister Gerlien Croes.

Diaranson ultimo, Parlamento a trata un ley di iniciativa di e parlamentarionan Edgard Vrolijk y Rocco Tjon. Cu esaki, Vrolijk ta marca su di 9 ley di iniciativa y Tjon su di 5. E cifranan aki ta papia pa nan mes: MEP ta tuma su responsabilidad cu e comunidad hopi serio, dunando contenido real na e derecho di iniciativa (*initiatiefrecht*).

Integridad ta e fundeshi: Pa e Fraccion di MEP, integridad no ta un concepto bashi, sino e fundeshi di confiansa entre un gobernante y su pueblo. Ora un Minister ta wordo cuestiona riba su actonan, manera e biahe den un jet priva, e unico contesta aceptabel ta e berdad absoluto y transparente.

Lider di Fraccion, Evelyn Wever-Croes, a splica cu MEP ta cla pa e siguiente paso den nomber di e bienestar di Aruba. "Nos ta considerando seriamente pa inicia un **Encuesta Parlamentario**. Esaki ta un instrumento fuerte di control pasobra pueblo tin e derecho sagrado di sa kico ta e berdad. Te awe, Minister Gerlien Croes no a duna un contesta cla ni transparente. Ora un Minister faya den su deber di duna cuenta, Parlamento mester actua pa restaura e respet pa nos institucionnan."

Honestidad sin condicion: E meta di MEP ta cla: claridad total. Den un democracia saludabel, transparencia no ta un favor cu un Minister ta haci, sino un obligacion legal y moral.

"Nos lo uza tur medio legal na nos alcanse pa haya e berdad. Pueblo di Aruba ta merece gobernantenan cu ta actua cu honestidad y cu no ta sconde tras di tecnicismo. Transparencia no ta un opcion, e ta nos deber principal pa cu e pueblo cu nos ta sirbi," Evelyn Wever-Croes a finalisa bisando.

Posicion actual di MEP riba Rijkswet ta contradeci documentonan firma na 2024



ORANJESTAD (AAN): Parlamentario di fraccion AVP, Carlos Bermudez, a expresa su preocupacion tocante e discusion reciente cu a bolbe surge rond di e tema di Rijkswet HOFA. Segun Bermudez, ta importante pa pueblo di Aruba tin claridad riba con e proceso aki a cuminsa y ken a pone e base p'e. Recientemente, Bermudez a tuma nota cu 19 di februari ultimo, lider di fraccion di MEP, Evelyn Wever-Croes, a entrega un documento di mas o menos 100 pagina na Paul Rosenmüller, den cual nan ta expresa cu nan ta contra introduccion di un Rijkswet HOFA. Segun Bermudez, e posicion aki ta causa confusion, pasobra tin documentonan oficial cu ta muestra claramente cu e proceso pa un Rijkswet a cuminsa durante e gobierno anterior bou mando di MEP.

“Mi persona kier presenta na pueblo di Aruba un documento di solamente tres pagina: e Bestuurlijk Akkoord. E documento aki a wordo firma pa Sra. Evelyn Wever-Croes dia 4 di juni 2024. Den e documento aki ta indica

claramente cu lo sigui cu un Rijkswet,” Bermudez a declara.

E parlamentario di AVP a señala ademas tambe un documento prepara pa fraccion di MEP mes, den cual nan a elabora un timeline cu ta muestra e proceso entre 2020 y 2025 pa yega na un asina yama “Hybride Rijkswet”. Segun Bermudez, esaki ta confirma cu durante e periodo anterior a forma un ekipo di profesional na Aruba cu a negocia cu representanten di Hulanda tocante e tema aki.

“Ta dificil pa compronde con awe nos ta mira un documento di 100 pagina caminda nan ta declara cu nan ta contra algo cu nan mes a cuminsa negocia anteriormente,” Bermudez a indica.

E parlamentario a recorda tambe cu durante e gobierno anterior frecuentemente a destaca e beneficio financiero di e acuerdo cu Hulanda, incluyendo e interes mas abou riba debe di Aruba, algo cu segun Bermudez, tur esunnan di MEP tabata pronkia cu ne como un logro importante.

“Awe cu e gobierno a cambia, di repente e mesun proceso no ta bon

mas. Pero pueblo mester corda claramente: dia 4 di juni 2024 e Bestuurlijk Akkoord a wordo firma, y sin e acuerdo aki, awe nos no lo tabata den un discusion tocante un Rijkswet,” Bermudez a enfatisa.

Segun e parlamentario di AVP, ora un pais entra den un proceso serio di negociacion cu Hulanda, esaki ta un proceso institucional cu no por wordo trata cu ligereza. “Un proceso manera esaki

no ta algo cu bo simplemente por bandona. Ta trata di un trayecto formal entre paisnan den di Reino, y mester trat'e cu responsabilidad y transparencia,” Bermudez a indica.

“Ta mescos cu bo ta bay un car dealer, nan bisa bo cu bo ta haya bo auto na october, anto na januari bo ta cuminsa paga; entrega e auto na januari, wak si nan ta tuma e auto bek. No, pasobra e proceso a cuminsa cana.

Ta un asunto serio,” Bermudez a duna como ehempel.

Finalmente, e parlamentario a confirma cu fraccion AVP den Parlamento di Aruba ta warda riba e consejo oficial di Raad van State tocante e proceso y e posibel legalizacion. “Nos ta kere cu e consejo di Raad van State lo ta importante pa duna mas claridad riba e siguiente pasonan den e proceso aki,” Bermudez a conclui.

Ombudsman mr. sra. Jurima Bryson

Rapport ‘Het Luisterend Oog’ ta indica cu mester mihor acceso na informacion y sistema di keho na Aruba

ORANJESTAD (AAN): Ombudsman di Aruba mr. Jurima Bryson a publica e rapport ‘Het Luisterend Oog’, cual ta un investigacion haci door di Bureau Ombudsman di augustus te cu september 2025 y cu tabatin como meta principal pa Ombudsman tin un lista actual di instancianan cu ta cai bou di Landsverordening Ombudsman y pues bao di su mandato.

E investigacion a identifica 564 instancia na Aruba cu ta den competencia di Ombudsman, hopi di nan ta organisacionnan priva cu ta traha cu mucha y hoben, manera scolnan, centro di cuido pa mucha y instancianan di salud.

Loke e investigacion ta demostra: E investigacion ta muestra cu na varios instancia informacion importante no ta actual of disponibel, manera number di contacto, nomber di directornan of informacion tocante procedura pa entrega keho. Esaki ta haci mas dificil pa ciudadanonan y mayornan haña acceso na informacion pa entrega un



keho.

Den sector cuido di mucha, investigacion a muestra cu menos cu mita di e centronan cu a wordo contacta tin un procedura di entrega keho cla y funcional.

E investigacion a muestra tambe cu e Registro Nacional di centronan di cuido no semper ta actual, pasobra por ehempel algun centro cu ta registra no ta operativo mas.

Pakico esaki ta importante: Si un instancia no ta facilmente accesibel pa publico of e no tin un procedura di entrega keho cla, ciudadanonan no por haci uzo di nan derecho fundamental y entrega keho.

Bon accesibilidad y informacion cla ta importante pa pueblo su con-

fianza den gobierno y pa proteccion di ciudadanonan incluyendo mucha.

Loke Ombudsman ta recomenda: Ombudsman a bin cu varios recomendacion entre otro pa gobierno y instancianan mehora transparencia, actualisa registranon y garantiza cu tur instancia tin un sistema di keho cla y accesibel. Esaki ta importante pa fortalece proteccion legal di ciudadanonan, specialmente di mucha y hoben.

E rapport ta forma un prome paso pa mehora accesibilidad, transparencia y manera cu kehonan ta wordo maneha den instancianan na Aruba.

Proximo paso: Ombudsman lo sigui progreso di instancianan encunto con nan ta trata cu e recomendacionnan aki. Tambe Ombudsman lo keda den contacto cu ministernan concerni, instancianan y supervisornan encunto esaki.

E rapport completo “Het Luisterend Oog” ta disponibel riba website di Ombudsman, www.ombudsman.aw/pa/publicacion/.

Un tendencia creciente entre hobennan

Laga nos compronde e fenomeno 'Therian'

Seccion Hubentud den Movecion ta haya e tema aki sumamente interesante, y algo hopi bon pa comparti cu nos lectornan, muy en particular nos hobennan y nan mayornan.

Den e ultimo añanan a surgi un tendencia hubenil cu a cuminsa genera combersacionnan den familia, scol y comunidannan. Esaki ta e fenomeno "Therians". Aunke pa hopi adulto por parce straño of confuso, compronde su origen y nificacion, ta fundamental pa analiza con e ta influencia e identidad y comportacion di algun hoben, actualmente.

E termino Therian ta bin di e palabra "theriantropy", cu ta combina raiznan griego cu ta nifica "animal" y "humano".

Den e contexto moderno, e ta wordo uza pa describi personanan cu ta sinti un conexion psicologico of spiritual profundo cu un animal specifico. Ta importante pa aclaria con cu e mayoria di esnan ta identifica nan mes como "therians" ta reconoce cu físicamente nan ta humano; no obstante, nan ta expresa cu nan ta sinti cu nan identidad interior ta relaciona cu un animal, manera un wolf, un zoro, of un pushi. E fenomeno aki no a sur-



gi recientemente, aunke su visibilidad si t'asina. Na e largo di historia ha existi narrativa y simbolonan cu ta combina caracteristicas canan humano y animal. Den mitologianan antiguo y tradicionnan cultural ta aparece figuranan mitad humano y mitad animal, of creencianan den spiritunan animal cu ta acompaña e personanan.

Sinembargo, e movimiento moderno di e "therians" a cuminsa den e decada di 1990, den comunidannan di internet. Foronan den linea dedica na e fantasia y storianan di homber wolf, tabata e espacio den cual algun persona a cuminsa comparti experencianan personal di sinti nan mes conecta cu animalnan. Cu

paso di tempo, e combersacionnan aki a evoluciona den comunidannan digital mas structura.

E expansion masivo di e tendencia aki a sosode cu e yegada di e rednan social, specialmente plataforma manera "tiktok", na unda miles di video a cuminsa mostra hobennan usando mascara di bestia, cola y accesorionan cu ta representa na nan animal identifica. Algun tambe ta practica un actividad conoci como "quadrobics", cu ta consisti den imita movecionnan animal coriendo of desplazando nan mes den cuater pata.

Sinembargo, specialistanan den educacion y desaroyo hubenil ta señala cu e fenomeno tambe ta refleha un realidad mas profundo: e hobennan ta den constante buskeda di identidad, aceptacion y comunidat.

Den un mundo digital, na unda e modanan ta propaga cu rapidez, e expresionnan aki por bira un forma di exploracion personal.

Enfrente di e realidad aki, expertonan ta coincide cu e clave no ta reaccion cu alarma of ridiculizacion, sino cu informacion dialogo y comprension. Compronde e fenomeno ta e prome paso pa acompaña e hobennan di manera responsabel y constructivo.



Reflexion, Hesus Biña Nobo:

SEA SEMPER CONTENTO



Bo a yega di scucha e cancion "Sea semper contento"?

Por ta bo mama of wela a yega di cant'e pabo, of porta bo mes a scuche na radio un dia.

Si mAwé mi lo a pensa "wel, esey mi kier ta semper". Pero en realidad e ta difícil tin biaha pa ta contento pasobra tin cosnan cu ta pasa cu no t'asina agradabel.

Situacionnan cu bo por kier pa cambia pero ainda ta mesun cos. Hendenan cu a tratabo malo y a afecta bo curazon y emocionnan.

Pero e cancion aki ta bini di un versiculo den Bijbel y bo ta haye den 1 Tesalonisensenan 5:16. E ta algo cu Dios ta bisa nos pa haci. Pero con?

1.) Pone bo bista riba Señor.

Tin hopi cos cu por pasa rond di bo. Pero den tur cos y tur momento, Dios ta keda bon. Y si bo por corda esey, bo lo ta contento. Pasobra E ta bon. Y E ta worry pa bo. Dicidi pa pone bo bista riba Señor, y wak con bo perspectiva y curazon ta cambia.

2.) Duna gradicimento.

Tur dia tin algo pa ta gradici pe. Y si bo cuminsa wak e cosnan cu bo a wordo bendiciona cune, e lo yuda bo ta contento.

Pasobra aunke tin cosnan cu por haci nos tristo, rabia, of gestres, tin tambe diferente cosnan cu por haci nos contento.

Ban ta hendenan cu ta semper contento. Si Dios a bisa nos haci esey, kiemen e ta posibel. Cu Dios tur cos ta posibel.

Bo ta kere esaki?

Lider di grupo Edmira Christiaans

Grupo Scout Ora Ubao Aruba ta invita mucha y hobennan pa uni na aventura scout

ORANJESTAD (AAN): Scouting ta un movimiento mundial cu pa hopi aña a dedica na formacion di mucha y hobennan, dunando nan e oportunidad pa desaroya balornan importante manera responsabilidad, respet, liderazgo y trabou den

ekipo. A traves di actividadnan educativo y recreativo, muchanan ta siña pa conoce nan mes, fortalece nan talento y bira ciudadano responsable den comunidad.

E metodo scout ta un sistema educativo **no formal**, cu ta enfoca riba desaroyo integral

di hobennan a traves di balornan scout.

Den e proceso aki, ta traha riba diferente **area di crecemento**, manera creatividad, caracter, afectividad, social, spiritual y fisico.

Grupo Scout Ora Ubao Aruba ta invita mayornan pa anima nan yiunan pa bira miembro di e movimiento scout y asina participa den actividadnan cu ta contribui na nan desaroyo personal. Mayoria di e encuentronan ta tuma lugá riba **diasabra atardi**.

Den un combersacion no oficial cu **DIARIO**, señora **Edmira Christiaans**, lider di grupo, a enfatisa cu scouting ta ofrece un ambiente sano unda muchanan por siña, hunga, ex-



plora y forma amistadnan nobo mientras nan ta desaroya balornan pa bida.

El a remarca cu miembrecia ta habri pa mucha y hoben di 11 pa 14, Verkenner y 15 pa 18, Explorer.

Alabes el a duna di conoce cu Grupo Scout Ora Ubao Aruba ta busca **lidernan boluntario**, hendenan cu tin amor pa mucha y cu

kier contribui na guia y formacion di nos futuro generacion.

Mayornan cu ta interesa pa inscribi nan yiunan, of tur persona cu kier contribui como boluntario, ta wordo invita pa tuma contacto cu Grupo Scout Ora Ubao Aruba pa ricibi mas informacion, via nan pagina di Facebook of via telefon 593-1540.

Haydee Henriquez, President di Wilhelmina Fonds:

Ta invita comunidad na e simposio pa celebra 65 aniversario di Koningin Wilhelmina Fonds

ORANJESTAD (AAN): Fundacion Koningin Wilhelmina Fonds Aruba (KWF) ta sigui hunga un papel importante den promove conscientisacion, cuido di pashentnan y prevencion di cancer na Aruba. Mediante educacion, informacion y actividadnan comunitario, e fundacion ta traha continuamente pa trece mas conocimiento riba e enfermedad aki, ofrece sosten na famianan afecta y contribui na reduccion di e impacto di cancer riba nos comunidad.

Relaciona cu celebracion di su 65 aniversario, KWF ta organiza un simposio special cu lo tuma lugá diasabra 14 di maart proximo, for di 6:00 te 9:00 p.m. na Aruba Marriott Resort & Stellaris Casino. Durante e anochi aki, participantenan lo ricibi informacion valioso riba diferente tipo di cancer y e desaroyo mas reciente den e area di prevencion y diagnostico.

Pa e actividad aki tin un contribucion di 35 Florin cu

lo cubri e cuminda durante e anochi.

President di KWF, Haydee Henriquez, a indica cu e simposio tin como meta principal pa sigui fortalece conscientisacion y comparti informacion cu por yuda comunidad compronde miho e importancia di deteccion tempran y prevencion.

Durante e programa lo tin presentacion di diferente especialista.

Dokter Daryanani lo trata e tema di cancer di pecho, mientras dokter Franca lo presenta informacion tocante cancer di tripa. Ademá, di parti di Departamento di Salud Publico (DVG), señor Maduro lo comparti cifranan actualisa riba e situacion general di cancer na Aruba.

KWF ta invita publico pa participa na e simposio aki y aprovecha e oportunidad pa amplia nan conocimiento riba e enfermedad aki cu ta afecta hopi famia den nos comunidad.



Alba a gana bon placa cu sorteo di Zodiac



ORANJESTAD (AAN): Bo tin di djis cumpra un number consistiendo di cuatro cifra, y agrega un signo zodiacal pa asina bo ta den wega di Zodiac.

Esey ta loke Alba a haci, y el a bin nota cu el a gana! Pesey riba Dialuna el a acudi

na oficina di Lotto pa reclama su premio. Aki e funcionaria a revisa su ticket pa check si el a pone su firma, y su numbernan di banco na e parti patras di ticket. Ora di scan e barcode, e computer a confirma cu Alba a gana 12.750 Florin cu e sorteo di

Zodiac Merdia.

Mesora a sigui cu e proceso pa transferi e premio electronicamente pa su cuenta di banco. Alba a indica cu e ticket ganador el a cumpra na Lucky Numbers Eagle.

Cu hopi orguyo Aruba Bank a patrocina Festival Un Canto Pa Aruba Su Himno y Bandera 2026

ORANJESTAD (AAN): Aruba Bank a brinda su sosten den e di 29 edicion di Festival Un Canto Pa Aruba Su Himno y Bandera – categoria Adulto. Como un institucion comprometi na su cultura y tradicion di Aruba, Aruba Bank tabata tin e honor di patrocina e premio pa e ganador(a) di e categoria Himno y Bandera den e importante evento cultural aki.

E festival, cu ta celebra e identidad nacional di Aruba atraves di musica y folklore, a tuma lugar fin di siman na Aruba Carnival Village.

Durante e celebracion, atencion special a wordo duna na e importancia di mantene bibo y promove e musica tradicional Arubano. E competencia a inclui diferente categoria pa reconoce tanto composicionnan moderno como tambe estilo tradicional, manera Tipico di Antaño. Como patrocinador di e premio principal,

Aruba Bank a reafirma su compromiso pa continua stimula talento local y sostene iniciativanan cultural. E banco ta reconoce cu eventonan manera esaki ta fortalece union den comunidad y ta contribui na un

apreciacion mas profundo pa nos herencia cultural.

Aruba Bank ta felicita tur participante y finalistanan cu a demostra gran talento y dedicacion.

Un felicitacion special ta bai pa Alexa Croes, ganadora den categoria Himno y Bandera. Tambe un pabien pa Raquel Lampe y Rachel Kraaivanger, ganadornan den categoria Tipico di Antaño.

Aruba Bank ta gradici e comunidad cu a sali na masa pa sostene e gran evento aki.



Dorna den colornan patriotico solamente pa e luna aki

Anker historico ta simbolisa fortaleza y herencia cultural di Aruba

• A honra famia Brouns tambe!



ORANJESTAD (AAN): Si man a habri cu ceremonia di conmemoracion di e anker historico, un simbolo importante di herencia cultural y identidat di Aruba. Durante e acto, varios orador a recorda e historia y significado di e monumento, cu pa decada a representa estabilidad y perseverancia di e pueblo Arubiano.

Durante e ceremonia, Leon M. Berenos a comparti e trasfondo historico di e simbolo aki, den presencia di Prome Minister Mike Eman, Minister di Turismo Wendrick Cicilia, famia di Charlie Brouns Jr. y invitadonan.

Premier Eman a expresa su emocion di por celebra e momento aki hunto cu e famia Brouns. Segun Premier Eman, e anker, instala tambe como un homenage na Charlie Brouns Sr. y Charlie Brouns Jr., dos generacion cu a hunga un papel importante den historia di Aruba y su desaroyo turistico.

“E bar di Charlie Brouns ta un di e luganan emblemá-



tico cu hopi turista ta bishita ora nan yega Aruba. E tres generacion di e famia a contribui hopi na turismo di Aruba y na e manera special cu Aruba ta ricibi su bishitante- nan,” Eman a comenta.

Segun Prome Minister, e anker, instala dia 31 di maart 1985, a bira un simbolo cu pa aña a recorda e relacion entre historia, turismo y identidat di Aruba.

Segun Berenos, e historia di e simbolo aki ta conecta cu e legado di Charlie Brouns Sr., kende a establece su bida na Aruba despues di a nace na Hulanda. Hunto cu su esposa Marie, el a funda un negoshi cu despues di varios aña a evoluciona den un punto di encuentro marino importante, trahadonan di industria petrolero y bishitante na Aruba.

Den 1941 el a habri Charlie's Bar, un establecimiento, cu despues di 36 aña a pasa na su yiu Charlie Brouns Jr., kende a sigui desa-

roya e legado familiar. Mas despues, e tradicion a sigui cu Charlie Brouns III, manteniendo e herencia cultural y comercial di e famia.

Un di e momentonan historico mas notabel tabata e colocacion di e anker historico dia 31 di maart 1985. E anker, un pisa di origen Aleman, instala na Aruba y desde e tempo ey a bira un simbolo di forsa, estabilidad y resiliencia.

“Tur pais tin su simbolonan,” Berenos a splica, comparando e anker di Aruba cu monumentonan mundial manera Statue of Liberty na New York. E anker ta representa e caracter di Aruba: un isla cu, apesar di diferente desafio historico, semper a logra mantene su rumbo y fortaleza.

Durante e ceremonia tambe a hiba palabra Charlie Brouns III, kende a enfatisa e importancia di conta historia di Aruba den forma corecto y preserva su legado

pa generacionnan futuro.

“Nos ta un isla chikito pero nos tin un curason grandi,” Brouns a expresa, resaltando e orguyo nacional y e resiliencia cu ta caracteriza e pueblo Arubiano.

Contribucion: Durante e conmemoracion tambe a reconoce e contribucion di Wilhelm Geerman, miho conoci como Bill, kende voluntariamente a participa activamente den instalacion di e anker na Colony.

Su yiunan Alvin y Edith Geerman a comparti cu nan tata tabata un persona hopi dedica na comunidad di San Nicolas. Hunto cu Robby Brinkman, un constructor di boto, y Charlie di Charlie's Bar, nan a forma parti di e grupo cu a traha pa coloca e anker.

Segun nan, Geerman tabata un persona cu semper tabata kier sirbi su comunidad. Despues di su retiro di Lago, el a sigui activo den diferente iniciativa comuni-

tario y cultural.

Pa mas cu 40 aña, e anker a keda firme apesar di tempestad y cambio den historia di e isla. Pa hopi residente y bishitante, e monumento a bira un punto nacional cu ta recorda e fortaleza y perseverancia di Aruba.

E mensahe central di e ceremonia: e anker historico ta simbolisa e capacidad di Aruba pa mantene firme, preserva su herencia cultural y sigui avansa cu orguyo como pueblo.



SETAR ta celebra cultura di Aruba

Comunidad a bini hunto pa disfruta di Festival "Un Canto pa Aruba su Himno y Bandera"

ORANJESTAD (AAN): Aruba su orguyo cultural tabata exhibi durante e fin di siman cu a pasa durante e Festival Un Canto pa Aruba su Himno y Bandera Infantil y Hubenil como tambe Adulto, cu a tuma luga na Carnival Village na San Nicolas.

Organisa pa Comision Promove Cultura y Fundacion Cultural di Festival Folklorico, e festival a honra dos milestone importante den 2026: 40 aña di nos Status Aparte y 50 aña di nos Himno y Bandera.

E comunidad di Aruba a bini hunto pa disfruta di presentacionnan den e categoria di Infantil, Hubenil y Adulto, unda cu e participantenan a subi escenario pa deleita e publico presente y expresa nan amor y orguyo pa nos isla.

SETAR ta felicita tur participante y ganadornan den e categoria Infantil, Hubenil y Adulto como tambe tur agrupacion musical, compositor, arreglista y e comisionnan organisatorio cu a contribui na e exito di e festival, creando dos anochi memorabel yena cu musica, orguyo y e sentimento patriotico.

Como Aruba su compania nacional di telecomunicacion,

SETAR ta orguyoso di sostene eventonan cu ta celebra, preserva y engrandece nos herencia cultural y ta comprometi pa sigui inverti den actividadnan cu ta promove nos tradicionnan y cu ta inspira e futuro generacion pa balora y celebra nos identidad Arubiano.





RESULTADO DI SORTEONAN PA CORTESIA DI CADENA ALEXANDER

— Diamars 10 Maart 2026 —

DIARIO	KORSOU	LUCKY 3	CAT4CHI	ZODIAC
Anochi 2543 9646 6833	Anochi 6666 3927 4198	Merdia 710 X2 Anochi 736 X2	Merdia 0214 1950 X5 3993 Anochi 9573 8348 FP 6451	Merdia 4709 Aquario Anochi 2853 Virgo SUPER 4 Anochi 6043
BIG 4 Merdia X2 3964 Anochi X3 1828	OFF Merdia 6339 Anochi 6232	LOTTO DI DIA 17 - 20 - 24 - 29 - 30		

BUSCA PALABRA

R A S B E A M A N W I B
G A C L A S I C O C A A
E J S A L S A G M L E C
C U M B I A A Z R T H H
A N E O S A M B A E G A
B M A M E R E N G U E T
J O R O P O E H L H O A
C G O A J O S O C A E O
R E G G A E T O N O S G
J L O L N O E S A S R R
A Z E A O O A O A E U G
Z T A T Z B M S A T E A
Z A H D E M B O W G R B
I E B I O R E L O B E R

Merengue	Reggaeton	Cumbia	Salsa
Clasico	Bachata	Samba	Soca
Joropo	Bolero	Dembow	Jazz

> SUDOKU <

King Classic Sudoku

		8		6				5
3	9		4			8		1
1				8	3			4
9		7		3	5			
	8	3		1		6	5	
6	5	2	7	4		9	1	
			3				2	
7			1		6			8
5			8	2				

Difficulty: ★★

4-11

Boto a pega riba baranca na Corsou

WILLEMSTAD: Wardacosta di Caribe Hulandes y organizacion CITRO a bay rescata un persona cu a bay pega cu su boto contra barancanan na entrada di Santa Barbara na Corsou.

Riba su propio riesgo, Wardacosta a rek y saca e boto, y despues CITRO a hibe na un lugar safe, unda a sake mesora di awa pa asina minimaliza e daño. Ningun hende a resulta herida.



Hari Un Tiki

Un homber a yega cas despues di a bishita su suegra na hospital, y na un forma bastante preocupa, el a drenta den cushina y a bay a bisa su casa:

—“Dushi, bo mama ta bin biba cu nos”.

E casa sorprendi a bira mir’e y a puntr’e:

—“Y pakico esey?”

E homber a contest’e:

—“Pasobra Docter a caba di bisami cu nos por spera lo peor.”

Solucion Anterior

5	2	7	9	6	3	4	8	1
4	1	3	7	2	8	5	6	9
6	8	9	1	4	5	2	3	7
1	7	5	6	9	2	3	4	8
8	6	4	5	3	7	1	9	2
9	3	2	8	1	4	7	5	6
2	5	1	3	8	9	6	7	4
7	4	8	2	5	6	9	1	3
3	9	6	4	7	1	8	2	5

Difficulty: ★

4-10



RESULTADO

Diamars 10 Maart 2026

Sorteo #1851

02 05 19 30

● ● ● **Mega Ball: 9**

1^{er} Premio:

2^{do} Premio:

3^{er} Premio:

4^{to} Premio:

5^{to} Premio:

*Demas informacion no a wordo suministra na tempo
Diamars anochi
door di Fundacion Lotto*

Jackpot pa e proximo Sorteo Mini Mega: 14 MAR. 2026

- NO TA CONOCI -

EMERGENCIA NA ARUBA

Diaranson 11 Maart 2026

DOCTER NA WARD

SAN NICOLAS:

Pa San Nicolas, Docter lo ta na H.A.P. ImSan.
Docter tey for di 6’or di anochi te 10’or di anochi.

ORANJESTAD:

Pa Oranjestad, Docter lo ta na Huisartsenpost H.A.P. na Hospital. Docter tey di 6:30 pm te cu 10:30 pm.

BOTICA NA WARD

PARIBA DI BRUG:

Botica 4 Centro Medico
Bernhardstraat 55
Telefon 584-5794

PABAO DI BRUG:

Botica Dakota NV
Avenida Milio Croes 45
Telefon 588-7464

DIARIO

Loke Tempo ta Mustra....



•• Entrante awe, biento lo cumina debilita un poco a region local, y humedad modera por yega den region y trece poco awacero breve awemainta, pero no ta yobida di importancia.

•• Biento di Pariba basta fuerte entre 20 y 39 km/h, cu rafaga te 61 km/h. Lama bruto cu ola entre 4 pa 6 pia.



ALMANAC



**Bahada
y salida
di solo
na Aruba**



**Lista di
Crusero
di bishita
na Aruba**

—11 Maart 2026

Solo ta baha: 6:50 p.m.

—12 Maart 2026

Solo ta sali: 6:50 a.m.

**Bo mester di un hende
pa Scucha bo ??**



Tel: 583-1190

Anonimo y Confidencial

—Diaranson 11 Mar. 2026:

Celebrity Silhouette:
(07:00 - 17:00)

Carnival Magic:

(09:00 - 22:00)

—Diahuebs 12 Mar. 2026:

Brilliance of the Seas:

(08:00 - 23:00)

Oceania Allura:

(11:00 - 23:00)

—Diadomingo 15 Mar. 2026:

Star Pride:

(06:00 - 18:00)

—Dialuna 16 Mar. 2026:

Valiant Lady:

Legado di Dr. Joel Rajnherc



Tin momento cu bida ta pidi algo simpel pero profundo: respet. E fayecimento di Dr. Joel Rajnherc no ta solamente un perdida di un dokter respeta y stima. E ta e perdida di un lider cu a laga un marca profundo riba e manera cu nos isla ta pensa tocante cuida di salud.

Pa hopi hende na Aruba, Instituto Medico San Nicolas (ImSan) no ta solamente un institucion medico. E ta un simbolo di speransa, di inovacion y di cuida humano. Y durante añanan, e simbolo ey a wordo forma bou di liderazgo di Dr. Rajnherc.

P'esey mi a mira cu tristesa cu, mes dia cu a anuncia su fayecimento, ya tabatin speculation den algun medio tocante posibel reemplasantenan. Incluso, den e tabloid cu hopi biaha ta actua como microphone di poder politico, dos persona sin diploma ni conocimiento den cuida di salud a cuminsa discuti nombramentonan prome cu e pueblo a haya tempo pa procesa e perdida. Esaki ta hustamente un momento cu ta pidi sabiduria. Lo tabata apropia pa tin un pausa, un momento di reflexion, un momento di respet. Pueblo, pordonan, pasobra hopi biaha hende no ta compronde e peso di nan palabranan.

Un legado cu no por wordo ignora

Pa duna un rato di respet debido, ta bon pa para keto na e legado indiscutibel di Dr. Rajnherc. Bou di su liderazgo, ImSan a bira un institucion reconoci tanto localmente como internacionalmente. Entre su logronan mas importante tin:

Acreditacion pa Joint Commission International (JCI),

Desaroyo di un centro di oncologia di nivel halto, Reconocimento internacional pa calidad di cuida, Y mas importante ainda: confianza di nos pueblo.

Pero talbes su logro mas grandi no tabata solamente infraestructura ni tecnologia. Tabata inverti den hende. Cualkier organizacion serio sa cu su recurso mas valioso no ta edificio ni aparato. Ta e profesionalnan cu ta trahatur dia pa e bienestar di pashentnan. Y den e area ey, Dr. Rajnherc a muestra algo raramente bisto: e capacidad pa inspira, guia y uni hende rond di un vision comun. Logronan manera esey no ta parece automaticamente. Nan ta fruto di un liderazgo berdadero.

E proximo paso

Kico awor? Eventualmente, ImSan lo tin un director nobo. Pero si Aruba ta serio tocante proteha e legado cu a wordo construi, e decision ey mester wordo tuma cu sabiduria, transparencia y responsabilidad.

Un lider pa un institucion medico moderno mester tin mas cu solamente competencia tecnico.

E mester tin experiencia cu liderazgo institucional, un record cla di proyectonan logra, y, mas cu tur cos, un capacidad comproba pa lidera hende.

Pasobra, na final, un hospital no ta djis un edificio. Ta trata un comunidad di profesionalnan dedica na cuida humano. P'esey e decision cu lo wordo tuma lo muestra claramente si nos institucionnan a madura suficiente y ta pone interes di pashentnan na prome luga - of si nos ta sigui trata posicionnan clave den nos institucionnan como premio politico.

Un yamada pa madurez institucional

Aruba ta yega na un momento den su desaroyo institucional caminda e pueblo ta spera algo mas: transparencia y madurez den decisionnan publico.

Nombramentonan cu tin impacto grandi riba cuida di salud nacional no mester wordo percibi como resultado di calculacion politico, sino como resultado di un proceso serio, transparente y basa riba merito di e persona cu ta wordo nombra. Kico ta su track record? Un director cu nunca antes a lidera un team exitosamente dificilmente lo por cumpli cu e responsabilidad grandi cu e puesto ta exige. Y nos no mester lubida: banda di e legado extraordinario cu a wordo construi na ImSan, e standard di liderazgo ta poni hopi halto.

Lo contrario tambe ta un hecho. Historia ta muestra cu ora un puesto importante ta bira recompensa politico, casi semper e institucion - y eventualmente pueblo - ta paga un prijs hopi caro. Den cuida di salud, e prijs ey por costa hasta bida.

Y si nos ta papia tocante cuida di salud, ta natural cu e boz di pashentnan tambe merece wordo tendi. Organizacionnan di pashent, cu representan experiencia directo di cuida medico, por ofrece un perspectiva valioso den e proceso di reflexion tocante nombramento y liderazgo institucional.

Un legado cu merece proteccion

Dr. Joel Rajnherc no a construi solamente un institucion. El a construi un cultura di cuida humano cu calidad. E legado ey merece respet. E legado ey merece continuidad. Y e legado ey merece decisionnan cu ta honra e vision cu a haci ImSan bira loke e ta awe. Si nos por hasi esey, e ora nos no solamente ta honra memoria di un dokter extraordinario. Nos ta honra tambe nos mes como pueblo. Cuida di salud no ta pertenece na ningun partido politico. E ta pertenece na nos tur como pueblo.



Cu e proximo liderazgo di ImSan, mi ta spera cu e legado di Dr. Joel Rajnherc lo sigui biba - den e institucion cu el a yuda construi y den e cuida humano cu nos pueblo

merece.

Skirbi pa doctor Jayburt J. Dijkhoff

Experto den derechonan di salud publico y Presidente Fundacion SIKI

Columna E Sembrado



Diaranson 11 maart. Di tres siman di Cuaresma aña 2026 Ciclo A

Calendario Liturgico

Lectura: Deuteronomio 4, 1. 5-9;

Salmo: 147;

Evangelio: Mateo 5, 17-19;

” P'esey anto, si un hende no mantene hasta un di e mandamentonan di menos importancia na vigor y e siña otro hende haci mesun cos, lo e ta di menos importancia den reino di shelo. Pero esun cu cumpli cu nan y siña otro hende cumpli cu nan, lo e ta importante den reino di shelo.” Mateo 5,19

Hesus a siña su discipulonan cu E no a bin pa kita of kibra ley institui pa nan antepasadonan bou di direccion di Dios. E ta Mesias cu a bin pa laga nificacion di ley sali na cla pa tur cu ta observ'e. Cumpli cu ley ta un deber di cada un di nos, pero manera Hesus a bisa otro caminda, cu ley ta un medio, pero cu su berdadero proposito ta stima Dios riba tur cos sin condicion y nos prohimo manera nos ta stima nos mes. No laga nos imita esnan cu ta proclama nan bon obranan y nan oracion rond pa otro mira cu nan ta cumpli cu ley, mas bien laga nos imita esun humilde cu den su curason priva cu Dios, ta cumpli cu ley y ta cana den pleno santidad, manera e santonan a haci.

Oracion: Señor Hesus, haci mi curason pareu na Bo curason pa medio di Bo Spirito Santo cu ta reina cu Bo den tur eternidad. Amen.

Grupo Centro Pastoral Aruba

DEPORTE INTERNACIONAL

Raiders a cambia Geno Smith cu Jets



NEW YORK Geno Smith ta bolbe cu New York Jets despues di 9 temporada.

Las Vegas Raiders a dicidi di cambia e quarterback veterano y un escogencia den di 7 rond di draft cu Jets, pa un escogencia den di 6 rond di draft segun Adam Schefter di ESPN.

Smith, di cual a verwacht cu Raiders lo laga bay na comienso di e temporada nobo a cuminsa su carera di NFL cu Jets como un escogencia den di 2 rond di draft na 2013.

El a cuminsa 30 wega pa New York pero a faya di establece su mes como e quarterback di termino largo di e ekipo.

Smith a bandona Jets na 2017 y a fungi como backup pa diferente ekipo prome cu el a hunga bon pa Seattle Seahawks.

E hungador di 35 aña tabata lider di pasenan completa (69.8%) y pa prome biaha a tira 30 touchdown na 2022.

Aña pasa Raiders a firme y awor nan a cambie.

Kelce ta regesa cu Chiefs pa di 14 temporada



KANSAS CITY: Tight end veterano Travis Kelce ta bay sigui hunga pa Kansas City Chiefs.

Despues di especulacionnan cu Kelce lo por retira, el a confirma cu el a firma un contrato di 1 aña cu Chiefs, na balor di 12 milyon

dollar, segun Adam Schefter di ESPN.

Temporada cu a pasa tabata e ultimo den e contrato anterior di Kelce.

Kansas City a pasa den un mal temporada y a faya di yega playoffs pa prome biaha desde cu Patrick Mahomes ta nan quarterback.

Kelce di 36 aña por a haya un contrato mas atractivo si e lo a test e mercado di agencia liber, pero el a scoge pa keda cu Chiefs.

E 11 biaha hungador di Pro Bowl no a surpasa 1000 yarda mas desde 2022, pero asina mes el a captura 76 pase pa 851 yarda y 5 touchdown den 17 wega na 2025.

Greene di Reds pafo di accion te cu Juli



CINCINNATI: Pitcher strea di Cincinnati Reds Hunter Greene ta wordo verwacht di ta pafo di accion te cu luna di Juli.

Esaki despues cu el a haci un procedura pa saca pidanan chikito di weso for di su elleboog, segun Gordon Wittenmyer di The Cincinnati Enquirer.

Green tabata experiencia molester na su elleboog desde temporada pasa y a opta pa haci un MRI ora cu e dolor a regresa durante di

Spring Training.

E pitcher di 26 aña den 19 wega cu el a cuminsa temporada pasa a caba cu un record di 7-4 y un ERA di 2.76.

El a poncha 132 bateador den 107 inning y 2 tercio.

Reds y Greene tabata teme cu quizas e lo mester a haci ciruhia Tommy John cu lo a pone perde full e temporada, pero afortunadamente esey no ta e caso.

Galatasaray na cas a sorprende Liverpool



TURKIA: Ta conoci cu Galatasaray ta dificil pa gana na nan cas y esaki a wordo comproba un biaha mas Diamars den nan wega di Champions League contra Liverpool, ora cu via un gol trempa e ekipo Turco a gana e wega den e fase di knockout cu un score di 1-0.

E unico gol di wega a wordo anota

pa Mario Lemina den di 7 minuut caba.

Galatasaray a bay ariba 2-0 den di 70 minuut, pero VAR a anula e gol di Ibrahim Konate.

E wega tabata uno bastante limpi cu apenas 3 carchi geel.

Liverpool tabata tin un posesion di bala di 54% y Galatasaray su posesion tabata di 46%.



Noticianan for di Hulanda

Boet mas halto duna na online casino na Hulanda



HULANDA: E asina yama Kansspelautoriteit (Ksa) a duna e boet mas halto den historia. E compania di gamble Novatech, conoci pa websites di gamble Qbet.com y 55Bet.com a ricibi un boet di casi 25 milyon euro pa ilegalmente ofrece hende e oportunidad di bet riba weg of hunga weganen di casino. Banda di esaki Ksa a duna un multa di 2 milyon euro na Fortaprime. E compania ey ta tras di websites

manera amonbet101.com, kaasino.com y hiddenjack.com. Segun Ksa e sites a ofrece weganen ilegal di gamble na Hulandesnan. Empleadonan di Ksa a logra por ehempel di traha un account di hungador, a logra deposita placa y bet placa. Esey lo no mester ta posibel. E companianan no a tuma medidanan tecnico pa preveni participacion for di Hulanda.

Barco di marina Hulandes mester proteha e barco Frances porta avion y Cyprus contra raket y drones di Iran



HULANDA: Ta definitivo: Hulanda pa un tempo cortico ta bay participa na e mission maritimo Frances di defensa. Hulanda lo manda un fregata pa participa na un mission Frances dirigi na defende Cyprus y e ruta comercial den e region. Pa ta solidario como aliado Hulanda a bay di acuerdo cu e peticion

di Francia, ministernan Tom Berendsen (Asuntonan Externo) y Dilan Yesilgöz (Defensa) a informa Tweede Kamer. Un di e tareanan di e barco Hulandes ta pa defende e aeropuerto di Cyprus. Evertsen ta e fregata di defensa aereo y comando mas avansa cu Marina Real tin.

Den luna di Februari tabata tin un inflacion di 2,4% mas halto cu den mesun luna aña pasa



HULANDA: Bida diario tabata un average di 2.4% mas caro compara cu den e mesun luna aña pasa. Esaki segun Centraal Bureau voor de Statistiek (CBS) a base di cifranan definitivo. E inflacion a keda mescos compara cu un luna anterior.

E inflacion di Februari ta di promedio cu e guerra di Merca y Israel contra Iran. Economistanan ta teme cu si e conflicto dura largo e inflacion por subi fuertemente. Esaki debi na e aumento fuerte den e prijs di petroleo y gas.

Hobennan menor di edad por cumpra vapes facilmente na tiendanan y esey ta prohibi: dokternan ta adverti contra adiccion



HULANDA: Muchanan menor di edad por cumpra vapes na diferente tienda, mientras cu esaki ta prohibi. Dokternan ta bati alarma pa loke ta posibel adiccion y nan ta haya sosten di hobennan cu a bira adicto. Un di e hobennan aki ta Isamae kende a indica cu anochi e ta inhala mas cu 2000 biaha y no ta drumi. Kobe a conta cu ora cu e tabata tin 12 aña y a cuminsa bay un scol secundario na dado momento el a

wak hobennan ta vape riba e parkinglot y el a dicidi [a tambe participa. “Mi no tabata tin idea con malo esaki ta pabo”, segun e hoben cu awor tin 17 aña. Awor Kobe kende no ta vape mas pero a cuminsa huma cigarra, ta desea cu nunca el a cuminsa vape. Hunto cu dokternan den un campaña nobo e ta bati alarma y ta boga pa stop of controla mihor benta di vapes na hobennan.

Noticia Internacional

Trump a bisa cu papia cu Iran ta “posibel” pero a adverti cu Merca ta gana e guerra



Presidente di Merca Donald Trump a insinua diamars cu e lo ta dispuesto pa papia cu e liderazgo nobo na Iran pero a adverti cu lo depende di e terminonan di e dialogo, pasobra Washington ta ganando e guerra contra Republica Islamico.

Den un entrevista cu Fox News, Trump a reitera cu el a scucha lidernan Irani “ta hopi ansioso pa papia”, algo cu Teheran ta nenga

categoricamente.

Puntra si e lo ta dispuesto pa papia cu Iran, e mandatario a contesta: “Ta posibel.” “E ta depende di e terminonan. Posibel, simplemente posibel... No tin mester di papia di dje mas, si bo pensa riba dje, pero e ta posibel”, el a agrega.

Trump tambe a expresa su sorpresa riba e atakenan di Iran contra paisnan di Golfo como respuesta na e operacion militar con-

hunto Mericano-Israeli, cu ya a alcanza mas di 5 mil blanco na Iran desde su lansamento dia 28 di februari, segun Pentagono.

“E resultado asina trempa a surpasa e expectativanan,” Trump a afirma. “Ora nos a ataca nan prome, nos a desactiva 50% di nan misilnan, y si nos no a haci esey, e lo tabata un lucha hopi mas duro”, el a agrega.

E mandatario a reitera su malcontento cu e eleccion di Mojtaba Khamenei, yiu di defunto Ali Khamenei, como e lider supremo Irani nobo despues di morto di su tata den e atakenan inicial di e guerra. “Mi no ta kere cu mi por biba na paz,” el a bisa di e religioso di 56 aña, mira como un reto pa Washington meymey di e ofensiva cu ta busca pa decapita e gobierno di e ayatollahnan.

Noboa a afirma cu Hamas, Hezbollah y Guardia Revolucionario Irani ta entrena criminalnan na Ecuador



Presidente di Ecuador, Daniel Noboa, a afirma cu organisacionnan manera Hamas, Hezbollah, y Guardia Revolucionario di Iran ta vincula cu e entrenamiento di gruponan criminal Ecuatoriano, den un entrevista cu e medio Mericano Univision, den cual el a aborda e expansion di crimen organisa y e posibel conexiionnan internacional di e gangnan cu ta opera den e pais.

Durante e entrevista televisa, e mandatario a afirma cu algun organisacion criminal local a ricibi entrenamiento of apoyo di structuranan vincula na e gruponan aki, cu ta wordo considera organisacionnan terrorista pa varios pais y instancianan internacional. Segun Noboa, e rednan aki ta forma parti di un estructura transnacional cu ta alimenta violencia y

traficacion di droga na Ecuador.

E declaracionnan ta bin meymey di e crisis di seguridad di e pais, marca pa fortalecimiento di bandanan criminal, escalacion di homicidio, y presencia di organisacionnan vincula cu trafico internacional di droga. Desde januari 2024, e gobierno di Ecuatoriano a declara e existencia di un “conflicto arma interno” contra gruponan di crimen organisa, cu e Poder Ejecutivo ta considera como organisacionnan terrorista y actornan beligerante no-estatal.

Den e contexto ey, Noboa a splica cu e problema di seguridad di Ecuador no ta limita na gangnan local, sino mas bien ta surgi di e dinamica di traficacion di droga regional y mundial. E pais a bira un punto strategico pa manda droga pa mercadonan internacional debi na su localidad geografico y infraestructura portuario, loke a permiti expansion di organizacionnan criminal cu ta mantene lasonan cu rednan internacional.

Tambe e mandatario a defende e necesidad di cooperacion internacional pa confronta e menasanan aki. Manera el a declara den e entrevista, combati criminalidad organisa ta rekeri coordinacion entre estadonan, comparti inteligencia, y accionnan conhunto contra e structuranan financiero y logistico cu ta sostene e economianan illicito aki.

Marco Rubio a acusa Iran di tene mundo “rehen” cu nan atakenan riba petroleo y paisnan bisiña



Secretario di Estado Marco Rubio a acusa Iran di tene mundo “rehen” cu su atakenan di represaya y a afirma cu Merca ta avanzando pa su obhetivonan militar den e conflicto, den un discurso den cua el a invoca decadanan di hostilidad Irani pa cu Washington pa hustifica e ofen-

siva continuo.

“Mi ta kere cu nos tur ta mirando awor aki e menasa cu e regimen clerical aki ta forma pa e region y mundo. Nan ta trata di tene mundo como rehen,” Rubio a bisa den un evento teni na Departamento di Estado. “Nan ta atacando paisnan bisiña, nan infra-

estructura energetico, nan poblacion civil,” el a acusa. “E meta di e mision aki ta pa destrui nan habilidad pa sigui haci esey, y nos ta bon na caminda pa logra esaki”, el a agrega.

Rubio a hiba palabra den un evento honrando Mericanonan inhustamente deteni y rehen den exterior, trahando un liña directo entre e crisis actual y e historia di confrontacion entre Washington y Teheran. “Nan a wordo funda, lamentablemente, riba un atake riba e hombernan y muhenan balente di nos servicio civil y exterior,” el a bisa, refiriendo na e secuestro di e embahada di Merca na Tehran door di radicalnan islamico

despues di e revolucion di 1979.

E Secretario tabata compaña pa familiarnan di Robert Levinson, un ex-agente di FBI cu a desaparece na 2007 riba e isla Irani di Kish. Washington a conclui na 2020 cu e gobierno di Iran tabata enbolbi den su presunto morto. Levinson tabata biaha oficialmente pa investiga falsificacion di cigarra, aunke The Washington Post a informa na 2013 cu e tabata trahando cu CIA riba un mision di recauda informacion no autoriza. Su caso ta “un recordatorio particular di e naturalesa di e regimen cu nos ta tratando cune na Tehran,” Rubio a bisa.

Noticia Internacional

Yiu muhe di Michael Jackson ta acusa e administradornan di e herencia di su tata di “desperdicio di recurso”



Paris Jackson a presenta un demanda legal nobo contra e administradornan di e herencia di su tata, alegando cu e accionnan legal recien di e ehecutornan tabata destina pa “haci e proceso mas costoso y prolonga posibel pa Paris” y yamando e accion “un desperdicio di recurso-nan.”

E documento nobo a wordo presenta dia 26 di februari den un Corte di Los Angeles, como contesta riba e petition di e oficialnan pa recupera gastonan legal relaciona cu un mocion anti-SLAPP cu nan mes

a presenta na November 2025.

E mocion anti-SLAPP — un medida diseña pa proteha contra demandanan strategico contra participacion publico — a wordo presenta pa motibo di e petition di Paris pa revoca cierto proceduranan di herencia, cu a busca pa cambia e manera cu ehecutornan a solicita gastonan legal for di e herencia. Na januari di e aña aki, e ehecutornan a presenta un di dos mocion cu ta reclama derecho riba mas cu \$115,000 na gastonan legal relaciona cu e mocion anti-SLAPP.

E reunion entre Gustavo Petro y Delcy Rodríguez diabierna lo tuma luga na un brug di frontera



E reunion programa pa diabierna entre e presidente di Colombia, Gustavo Petro, y e presidente interino di Venezuela, Delcy Rodríguez, lo tuma luga na e Brug Internacional di Atanasio Girardot, tambe conoci como e Brug di Tienditas, un di e cuater crusadanan cu ta conecta e departamento di Norte de Santander cu e estado di Táchira, segun Gobierno. E Presidencia a destaca cu e stadion Atanasio Girardot ta representa un “simbolo di integracion di frontera”.

E estructura aki ta conecta e municipionan di Villa

del Rosario (Norte de Santander) y Pedro María Ureña (Táchira), facilitando e fluho constante di transporte internacional di carga y pasajero atraves di un di e fronteranan mas druk riba e continente.

E lo ta e prome encuentro entre Petro y Rodríguez, cu a asumi e presidencia interino despues di e captura di Nicolás Maduro dia 3 di januari na Caracas durante un operacion militar di Merca.

Dia 18 di februari Rodríguez y Petro a papia na telefon. Despues di e combersacion, e presidente interino Venezolano

a declara cu nan lo topa “pronto,” djis despues cu e Ministerio di Asuntonan Exterior di Colombia a anuncia e “posibel” bishita di Rodríguez na Colombia.

Manera Delcy Rodríguez a splica despues di e yamada cu Petro, e proposito di e reunion di diabierna ta “pa sigui avansa riba temanan clave di e agenda economico, energetico y di seguridad, den cuadro di fortificacion di cooperacion y relacionnan di respet y trabou conhunto entre ambos pais.”

Papa Leo XIV a pidi pa un fin na e bombardeo den Medio Oriente

ROMA: Papa Leo XIV di adomingo a pidi pa stop e bombardeo na Medio Oriente y a expresa su miedo cu e conflicto por expande pa otro paisnan di e region, den un mensahe na final di e oracion di Angelus di diadomingo na Plaza di San Pedro.

“Rumannan stima, noticianan ta sigui yega for di Iran y henter Medio Oriente cu ta causa consternacion profundo,” e Papa a bisa, mirando for di e bentana di su estudio den e Palacio Apostolico.

El a agrega: “Na e episodionan di violencia y devastacion y e clima generalisa di odio y miedo ta agrega e miedo cu e conflicto lo plama na otro paisnan den e region, incluyendo Libano stima, lo wordo hinca

un biaha mas den inestabilidad.”

Papa a urgi “pa e zonido di e bomnan stop, cu e armanan ta keda keto, y cu un espacio pa dialogo wordo habri den cua e bos di e pueblo por wordo scucha.”

El a sigui bisa: “Mi ta confia e suplica aki na Maria, Reina di Paz. Laga e intercede pa esnan cu ta sufri pa motibo di guerra y compañía curasonnan riba e camindanan di reconciliacion y speranza.”

Den un entrevista siman pasa cu medionan di comunicacion di Vaticano, e Secretario di Estado Italiano, Kardinaal Pietro Parolin, a bisa cu gueranan preventivo “henter mundo ta core e riesgo di wordo sendi na candela.”

“Cu tristesa profundo, e pueblonan di Medio Oriente, incluyendo e comunidnan cristian cu ya ta fragil, a bolbe cay den e horror di guerra, cu ta tuma bida humano brutalmente, ta sembra destruccion, y ta hala nacionnan completo den un spiral di violencia cu consecuencianan insigur,” el a lamenta.

Papa Leo XIV su mensahe di pas

Papa Leo XIV a boga pa “fomenta un cultura di reconciliacion capaz di supera e globalisacion di impotencia, cu ta tenta nos pa kere cu un era liber di conflicto ta inalcanzabel”, den un mensahe manda diasabra pa e Reunion Internacional pa Paz y Reconciliacion teni na Universidad di Loyola den su



ciudad natal di Chicago, na Merca.

“Den un era cada bes mas marca pa e heridanan di guerra y violencia, boso esfuersonan ta absolutamente esencial,” e Papa a bisa den su mensahe.

El a conseha cu si nos kier “promove harmonia globalmente, ta necesario pa busca e participacion y compromiso di e comuni-

dad internacional pa motibo di e bienestar comun, cu ta transcende fronteranan, tradicionnan religioso y culturanan.”

Papa tambe a propone “colaboracion interdisciplinario sistematico, treciendo hunto institucion, organizacion, científiconan y lidernan di varios tereno pa logra e meta aki.”

**Pa chica Pos - Habri tubería y wc.
Servicio lihe y confiablel.**

Experiencia ta manda
CICLONE
Septic Tank Service

Tel: 564-0607 / 734-0607

**TA FURA
ELMA UPHOLSTERY**

Matras, box busca mainta y
hay e atardi! Set di sala, tv
chair, sienta auto.

Tel: 565-5577
Macapruimstraat # 1L

**CONSTRUCCION
REMEDIACION**

Nos ta traha y drecha tur sorto
di dak: shingle, eterniet, panchi,
zink. Pega bloki, tegels, plafond,
pleister, pone porta, lanta cura,
basha vloer, construcccion di cas
y apto bon prijs. Free quotation.
Tel: 561-2137

ASSOCIATED REALTORS
CAS PA BENDE?

Bo tin pensa di bende bo cas?
Anto laga nos atende cu tur e
tramitanan di benta via notario.
Yama Mito na 593-6318 pa un
presentacion.

TA CHAPI
Corta mata.

Ta tira sushi afo. Nos
ta hardineria completo
na super bon prijs.
Tel: 569-8003

WASMACHINE
Ta drecha wasmachine,
dryer, stoof, forno.

Ta drecha, service y instala
airco. **Tel: 742-2518.**
Ta drecha na cas mes.

GRATIS

Auto bieu den cura? Nos ta
pikje pornada. Airco y bateria
tambe. Frigidaire, stoof,
wasmachine, dryer etc. ta 25,-
p/un. Yama nos na 561-4297
of 561-5179. Arubiano balente.

**JR PLOMERIA Y
CONSTRUCCION VBA**

Nos ta haci tur trabao
di plomeria grandi y
chikito. Lavamanos,
wc, lavaplato y ducha.

Jrplomeriaconstruccion@gmail.com • Sero Blanco 29-E
Tel: 563-4154 • 563-9130

TA CUMPRO
Holoshi antiguo
y moderno

di bon marca.
Tel: 744-9995

PROMASTER
Pa laba tapijt, sofa,
tur matras.

99% desinfecta.
Tel: 582-0383 / 593-3538
Leslie Maduro

DIARIO

Pa noticia, cumpleaños,
comentario, redaccion:
noticia@diario.aw

Tel: 582-6747

Comparacion di Rijkswet HOFA cu compra di un auto falta un parti importante



ORANJESTAD (AAN):
Parlamentario Bermudez ta
uza e comparacion di compra
di un auto pa purba hustifica
su acuerdo cu Rijkswet HOFA.
Segun e, si un auto ya a wordo
financia na banco y e auto ta na
caminda, bo no por bisa despues
cu bo no kier e auto mas.

Pero e comparacion aki ta
robes, pasobra e ta laga un
parti esencial afo!

E auto cu a wordo entrega
no ta e auto cu bo a bestel
Imagina lo siguiente

- bo a bestel un auto
automatico, pero ora e yega
ta resulta cu ta standard.

- Bo a pidi un auto
color geel, pero esun cu a
yega ta berde.

- Bo a bestel un motor
di 4 liter, pero esun cu ta
wordo entrega ta 2 liter.

Den tur situacion normal,
ningun consumidor responsabel,
y cu ta paga pa e auto,
lo acepta e auto. Bo lo bisa
simplemente: "Esaki no ta e
auto cu mi a bestel."

Un auto cu bo no a bestel
mester wordo entrega bek
Pa loke ta trata e situacion
cu Rijkswet HOFA ta mes-
cos cu e auto. E asina yama
"bestuurlijk akkoord" por
compara cu un bestelling
inicial. Pero e ley cu awor
ta riba mesa no ta igual na
loke a wordo discuti origi-
nalmente.

**TA CHAPI
TIRA SUSHI AFO
TRANSPORTE
DE CARGA**
Tel: 594-5115

Fraccion MEP:

Tur conseho huridico di-
sponibel pa Bermudez
tambe, ta confirma cu e
"bestuurlijk akkoord" no ta
obliga Aruba na nada. Esa-
ki kiermen cu Mike Eman
y Bermudez y Hart tin tur
derecho pa bisa: "Esaki no
ta e producto cu nos a pidi."

Bermudez y Hart kier ta
chauffeur pa Mike Eman
Enbes cu Bermudez y Hart
para firme pa Aruba y bisa
cu e ley mester wordo re-
chasa, Bermudez y Hart ta
scoge pa bisa cu nos mester
accepta e auto di tur manera.

Den otro palabra: e auto ta
berde enbes di geel, ta stan-
dard enbes di automatic,
y tin mitar di e motor cu a
wordo pidi — pero nan ta
bisa cu nos mester accept'e
toch paso no por entreg'e
bek.

Amor pa Aruba bo ta mustra

ora bo para pa Aruba y no
pa Hulanda

E Arubiano merece lider-
nan cu ta defende interes di
e pais aki. Ora un acuerdo
keda cla cu no ta bon pa
Aruba, liderazgo berdadero
ta nifica cu bo mester tin
corahe pa bisa:

"Nos no ta acepta esaki."

A bira tempo pa Bermudez
y Hart mustra Mike Eman
cu nan no lo ta entreguista
manera Geoffrey Wever y
Gerlien Croes!



FUNDACION VENERABLE
JOSE GREGORIO HERNANDEZ
TANKI LEENDERT 128



Ta invita

Nos devotonan contruibuidor y pueblo di
Aruba en general pa asisti na un CAMINDA DI
CRUZ Y SIGI PA UN SANTO SACRIFICIO DI MISA y
asina nos por sigi nos cuaresma jen di fe.

ATENCION
DIA 11 di MAART 2026
ORA 6.0R DI ANOCHI CAMINDA DI CRUZ Y MISA
7.0R
LUGAR SITIO DI ORACION

Tambe nos ta recorda bo cu ta Cuaresma, tempo
pa nos juda nos ruman nan den necesidad. Bo
por trece loke bo tin y nos lo traha e
basket. Danki

Bo presencia ta altamente aprecia

SANTOS
Coffee with Soul

Tin e tristo deber di anuncia fayecimento di su ex empleado:

Giliane Russianne Albert

< 19-05-1998 ~ 07-03-2026 + >

Na bida *Gilly* a forma parti di nos famia na Santos Coffee entre 2022-2024.
Un ser hopi alegre y responsabel cu a wordo stima door di tur cu a traha cune.

Un palabra di condolencia ta bai na *Gilly* su juinan, famia, amistadnan y coleganan.
Cu *Gilly* sosega na paz.



Inscripcion ta habri pa nominacionnan pa Copa Hubenil Gobernador Felipe B. Tromp 2026



ORANJESTAD (AAN): Comision Copa Hubenil Gobernador Felipe B. Tromp ta informa cu inscripcion ta habri pa entrega nominacionnan pa Copa Hubenil Gobernador Felipe B. Tromp pa aña 2026.

Ultimo dia pa entrega un nominacion lo ta diaranson 8 di april 2026 na Asociacion Trabou di Hubentud na Aruba (ATHA).

Na aña 1992, e Copa Hubenil a wordo estableci oficialmente. Esaki a tuma lugar despues cu señor Felipe B. Tromp, kende a sirbi como prome Gobernador di Aruba, a pasa e responsabilidad pa su sucesor, mr. Olindo Koolman.

Felipe B. Tromp a nace na Aruba riba 15 di oktober 1917 y a fayece riba 12 di augustus 1995. Durante su bida, el a distingi su mes como un figura importante den e desaroyo social y cultural di nos isla. El a tuma parti activamente den varios iniciativa y organisacion cultural, entre nan Fundacion Centro Cultural Aruba.

E fundacion menciona tabata encarga cu e promocion y desaroyo cultural na Aruba, y pa hopi aña el a haya respaldado financiero for di Sticusa, un fondo hulandes cu a brinda apoyo durante e periodo di 1948 te 1991. For di 1984, e recurso financiero a ta wordo dirigi directamente na Aruba.

Ademas di su trabou den e campo cultural, Tromp a ocupa varios posicion den servicio publico. El a desempeña su mes como politico, ministro y inspector di enseñansa. Na 1986, el a marca historia como e prome Gobernador di Aruba.

Kendenan ta bini na remarca pa e copa Hubenil? Un hoben of organisacion hubenil cu a destaca durante e ultimo aña sea riba tereno cultural, social of deportivo por wordo nomina. E edad mester ta entre 6 pa 20 aña. Y e periodo di e logronan mester ta di 15 di april 2025 pa 8 di april 2026. E logronan por ta premionan gana, pero tambe hopi impor-

tante loke e hoben of grupo a haci na nan propio formacion manera curso, trabou comunitario, disciplina etc. Comision ta invita tur instancia cultural, social y deportivo pa repasa e actividadnan realisa pa nos hobennan durante e periodo menciona y pa manda e nominacionnan prome cu 8 di april proximo. E ganado(nan) lo ricibi e premio for di man di Su Ex-

celencia Gobernador di Aruba dia 27 di april, dia di Rey. Por entrega e nominacionnan via e link comunica ariba ATHA su pagina di Facebook: ASOCIACION TRABOU DI HUBENTUD NA ARUBA – ATHA, personalmente na ATHA situa na Caya Appeldam # 2 of via email info@athaaruba.com.

Aurora
Royal Pray
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

Cu inmenso dolor na nos curazon, pero conforme cu voluntad di Dios, nos ta participa fayecimento di nos Mama stima:

Ana Maria Rafaël-Ras
Mihor conoci como "Mama Chichi of Chichi"
*6 juli 1932 – †7 maart 2026
Na edad di 93 aña



Na number di:

Yiunan:

Efraim "Frany" y Louise Rafaël-Croes
Roland "Lando" Rafaël
Richard "Shaty" y Zully Rafaël-Schwengle

Nieto(a)nan:

Francine, Lousette y Denise Rafaël
Rickward, Jaydrick y Zuri Rafaël

Bisnieta:

Lea Thiel

Consuegro(a):

†Fein y Chida Croes-Werleman
Ronny y Zulay Schwengle-Puyosa

Bon amigonan di cas: Dake, Fingal, Paula, Kelkboom, Leon, Tromp, Hernandez, Kelly, Bremono, Nobrega, van der Hans, Maduro, Simon, Vingal.

Ayudante di cas: Nolia

Famianan: Rafaël, Ras, Croes, Schwengle, Dirks, de L'isle, de Cuba, Geerman, Wever, van Gijn, Thiel, Falcon, Heidweller, Maduro, Luidens, Davelaar y demas famia.

Primo(a)nan, subrino(a)nan, bisñanan, amistadnan y conocirnan.

Nos disculpa si pa motibo di nos tristesa nos por a lubida algun familiar.

Acto di despedida lo tuma lugar:

Diabierna, 13 di maart 2026 for di 9:00AM – 11:00AM na Aurora Funeral Home, Cumana 76. Despues lo sali pa Santana Catolico di Santa Cruz.

Nos ta lamenta cu despues di entiero nos no por ricibi bishita di condolencia na cas.

Aurora
Royal Pray
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

If I should go tomorrow, it would never be goodbye.
For I have left my heart with you, so don't you cry.
The love that's deep within me shall reach you from the stars.
You'll feel it from the heavens, and it will heal the scars.

Cu dolor na nos curazon pero conforme cu voluntad di Dios nos ta anuncia fayecimento di nos ser stima:

Sra. Marilyn Elizabeth Joyce Dos Ramos
Carinosamente yama "Mer"
*01-06-1954 – †08-03-2026



Su Mayornan:

†Virgilia Dos Ramos-Caldeira
†George Dos Ramos

Na number di su:

Yiu: Jason y Katherine Steigenberger

Pareha: Orlando "Indio" Kelkboom

Manera nieto y nieta:

Zoey
Kher'Dion
Khe'Diangely
Kher'Diandro
Khloe

Ruman: †Nanette Dos Ramos

Manera ruman:

Anneke van der Zee

Subrina:

Diane Chin A Foeng y Kherwin Sambo
Mireille Chin A Foeng y Eldric Dijkhoff

Manera Yui:

Francois Citroën

Prima cu primonan:

Brian & Carol Dos Ramos, Desmond & Elizabeth Dos Ramos, Sandy Wiertzema, Jessica & Michael Rusynyk, Judy & Terrance Ramlho, Joanne & Jimmy Boisierre, Ann Marie Wood, Ince, D'Abrue and DeNobrega, Carl DeAbrue

Demas famia: Dos Ramos, Steigenberger, Chin A Foeng, Sambo, Dijkhoff, Kelkboom, Citroën, Van der Zee, Kock, Wiertzema, Rusynyk, Ince, D'Abreu, DeNobrega, Boisierre, Ramalho, Wood, Tromp, De Haseth, Oosterhuis, Arends, Kaffener, Winklaar, Deetje, Wernet, Davelaar.

Nos Disculpa si den nos tristesa nos por a lubida di menciona algun famia y of amistad.

Nos ta invita tur amigo y amiganan y conosirnan y demas famia pa e acto di condolencia y despedida cu lo tuma lugar diahuebs 12 maart 2026 na Aurora Funeral Home di 7pm pa 9pm sigui pa e acto di cremacion cu lo tuma lugar den seno familiar.

Nos deseo ta pa bin bisti na colornan alegre.

SUPER CARD SUPER DEALS



COMFORT CLASS

**Monday
Thursday**

8.00 AWG

**Friday
Sunday**

9.00 AWG

IMAX

10.00 AWG

11.00 AWG

VIP

11.00 AWG

12.00 AWG

**BEST CINEMA AT
THE BEST PRICES!**

Sign up today at any **The Movies** location
and **start enjoying great benefits!**

Federacion di Ahedres ta presenta plan di entrenamento na COA



ORANJESTAD (AAN): Algun siman atras a reuni cu miembronan di Directiva di e federacion di ahedres, unda a dialoga riba e posibel participacion di dos atleta hoben na e Weganan Suramericano di Hubentud (JSJ) Panama2026. Den cuadro di esaki, a reuni awe cu e entrenador nacional Sr. Lazaro Antonio Bueno Perez, cu a splica e plan di entrenamento cu e federacion a construi y ta implementa pa asina traha cu tur atleta di ahedres.

E federacion di ahedres "Aruba Chess Federation" tin dos atleta hoben cu a wordo proponi pa participa na e Weganan JSJ Panama2026, como e deporte di ahedres ta un deporte cu ta invita. Aunke ahedres normalmente no ta un deporte cu ta aparece na Weganan di e Ciclo Olimpico, e pais di Panama cu ta e anfitrión di e Weganan Panama2026, a inclui ahedres como e ta un deporte popular na e pais. Cu esaki, lo tin participacion di 18 diferente pais, entre otro Aruba.

Comite Olimpico Arubano (COA) su departamento tecnico (Direccion di Deporte (DdD) ta gradidi e federacion di ahedres pa e reunion unda a haya un bon presentacion pa cu e plan di entrenamento.



**NOW
IT'S TIME
GET THE
BEST DEALS
AT AMC UNICON!**

SHOP ON CREDIT & GET UP TO
**2 FREE
INSTALLMENTS**
PLUS FREE DELIVERY
FOR CREDIT CUSTOMERS
AT AMC UNICON!



55"
SAMSUNG 4K UHD
SMART TV
UN55U8000FPXPA
**NOW
AWG999**
WAS AWG1299.99

ALSO AVAILABLE IN:
43" UN55U8000FPXPA
**NOW
AWG999**
WAS AWG1299.99



65" TCL 4K MINI LED
GOOGLE SMART TV
65C755A
NOW AWG1299
WAS AWG1999.99



SAVE AWG101
LG
300W 2.1CH
SOUNDBAR
S40TDPANLLK
**NOW
AWG449**
WAS AWG549.99



SAVE AWG51
LG
XBOOM SIGNATURE
SOUND PORTABLE
BLUETOOTH
SPEAKER BOUNCE
**NOW
AWG349**
WAS AWG399.99



SAVE AWG101
JBL
PARTYBOX STAGE
320 PORTABLE WITH
PARTY LIGHTS
JBLPBSTAGE320AM
**NOW
AWG1099**
WAS AWG1199.99



569-2407
AMC EAGLE MEGASTORE

HORARIO: 9am - 6pm DIALUNA PA DIASABRA

OFFERS VALID WHILE STOCKS LAST.
TERMS & CONDITIONS APPLY!



YOU Anniversary:

Aruba Tourism Authority a celebra aniversario di dos miembro di ekipo na Europa



ORANJESTAD (AAN): Dia-
bierna 6 di maart 2026, Aruba
Tourism Authority (A.T.A.) a
celebra cu orguyo e aniver-
sario di dos miembro valioso
di e ekipo di Europa durante
YOU Anniversary na Hulanda.
E evento anual aki ta hon-
ra dedicacion, contribucion
y pasion di empleadonan di
A.T.A., resaltando e impor-
tancia di nan contribucion pa
cu e exito di Aruba como des-
tinacion.
Durante e ceremonia A.T.A.

a reconoce Caresse Imon,
Management Assistant EU
cu ta celebra 20 aña di servi-
cio y Tirso Tromp celebrando
25 aña den e organisacion,
continuando su trabou ofi-
cialmente desde April 2026
como Senior Business Man-
ager na A.T.A. na Aruba. Nan
compromiso continuo ta re-
fleha resiliencia, creatividad
y profesionalismo cu a yuda
impulsa crecimiento di Aruba
den Mercado Europeo. E cer-
emonia aki no solamente ta



marca e aña di dedicacion,
sino tambe ta celebra e logro
y esfuerso di cada un.
YOU Anniversary ta un tradi-
cion na A.T.A. unda ta honra
miembro di e ekipo cu a cum-
pli 5, 10, 20 y 25 aña di servi-
cio. Alabes cu ta marca e can-
tidad di aña, e evento tambe
ta reconoce logro individual
y e impacto positivo cu cada
empleado tin ariba exito tur-
istico di Aruba. E anochi
special aki a conta cu pres-
encia di Ronella Croes, CEO

di A.T.A., Sanju Luidens-
Daryanani CMO di A.T.A.,
Shadey Figaroa HR Manager
y Raul Piar hunto cu Emy
Lacle ehecutivonan di HR y
demas miembronan di A.T.A.
su ekipo na Hulanda.
Durante e ceremonia, CEO di
A.T.A. Ronella Croes a com-
parti un palabra di aprecio y
gratitud na e dos miembro di
ekipo y a gradici nan pa nan
sosten y compromiso con-
tinuo durante hopi aña: "Tur
idea genera, tur reto supera,

tur proyecto realisa y tur lo-
gro alcanza ta agrega profun-
didad na e balor unico cu tur
di boso, specialmente e dos
miembronan cu awe ta wordo
honra, ta aporta na A.T.A.
Boso contribucion y com-
promiso ta berdaderamente
obranan di arte."
A.T.A. un biaha mas ta ex-
tende palabra di felicitacion
y gratitud na Caresse y Tirso
cu merecidamente a wordo
reconoci pa nan tremendo lo-
gro y trabou.